

四庫全書

史部

欽定四庫全書

河南通志卷五十三

帝王

帝王統馭方夏河南志一省事也何以書從其建都者書之也志之為體列都邑表風俗紀名卿賢士大夫粲然備矣矧王畿肇建都邑之所由廢興風俗之所由升降士大夫之所由黜陟進退而可無紀歟又况自太皞以來先聖前民致用其遺風

餘烈猶有可追者歟至如后妃宣理陰教修成內治亦王化之所關也爰攷列史其事迹不具載載其歷年之久近與后妃冊封之年月著之篇令後得緣是以考諸史焉志帝王及后

古太皞庖犧氏風姓代燧人氏繼天而王母曰華胥履巨人跡於雷澤而生庖犧於成紀有聖德仰則觀象於天俯則觀法於地旁觀鳥獸之文與地之宜近取諸身遠取諸物始畫八卦以通神明之德

以類萬物之情造書契以代結繩之政於是始制
嫁娶以儷皮為禮結網罟以教佃漁養禽獸以供
犧牲故曰庖犧又曰處義氏有龍瑞以龍紀官號
曰龍師作二十七絃之琴以木德王都於陳在位
一百一十五年

朱襄氏自庖犧氏後歷十一氏而至朱襄氏都柘
城其時恒風振蕩果木不實朱襄命士達作五絃
之瑟以來陰氣定羣生而天下治又曰子襄氏

炎帝神農氏姜姓母曰女登有媧氏之女為少典
妃感神龍而生炎帝長于姜水因以為姓以火德
王故曰炎帝以火名官斲木為耜揉木為耒耜
之用以教天下故號神農氏於是作蜡祭嘗百草
始有醫藥又作五絃之琴教人日中為市交易而
退各得其所遂重八卦為六十四卦初都陳後居
曲阜在位一百二十年

黃帝有熊氏少典之子姓公孫名曰軒轅生而神

靈弱而能言幼而徇齊長而敦敏成而聰明時諸
侯相侵伐暴虐百姓帝乃習用干戈以征不享諸
侯咸來賓從而蚩尤為暴莫能伐帝乃徵師諸侯
與蚩尤戰於涿鹿之野遂禽殺之諸侯尊帝為天
子代神農氏王天下有不順者從而征之未嘗寧
居東至於海西至於崆峒南至於江北海北逐葷粥
於涿鹿之阿遷徙無常以兵師為營衛以雲紀官
舉風后力牧常先大鴻以治民時播百穀草木淳

化鳥獸蟲蛇旁羅日月星辰水波土石金玉勞勤
心力耳目節用水火財物有土德之瑞故號曰黃
帝生二十五子其得姓者十四人都於軒轅之邱
在位百年 按一統志軒轅邱在開封府新鄭縣
帝嚳高辛氏姓姬名姁黃帝曾孫祖曰玄囂父曰
蟠極帝生而神靈自言其名普施利物不於其身
聰以知遠明以察微順天之義知民之急仁而威
惠而信取地之財而節用之撫教萬民而利誨之

歷日月而迎送之明鬼神而敬事之其色郁郁其
德巍巍其動也時其服也士帝嘗既執中而徧天
下日月所照風雨所至莫不服從以木德王都於
亳在位七十年壽五百歲按一統志亳今偃師
縣

夏神禹姓姁氏黃帝之玄孫鯀之子當帝堯時洪水
滔天鯀治水無功於是舜舉禹使續鯀業禹既受
命傷父功不成乃勞身焦思居外十三年三過其

門而不入陸行乘車水行乘船泥行乘橈山行乘
櫟以開九州通九道陂九澤度九山乃相土田草
木之宜以作其賦東漸於海西被流沙朔南暨聲
教訖於四海於是錫玄圭告成功於天下及舜為
天子復代舜典百揆十有七年而舜命以位禹辭
避於陽城弗獲乃以正月朔旦受命于神宗率百
官若帝之初國號曰夏在位三十七年壽一百歲
按括地志陽城在今登封縣

帝啓禹之子克遵父業饗諸侯於鈞臺時有扈氏不服啓召六師以征之大戰於甘作甘誓而有扈氏遂滅在位九年 按括地志鈞臺即今禹州

太康啓之子荒逸弗恤國事畋於洛水之表十旬弗反有窮后羿因民弗忍距於河弗獲歸國遂都陽夏殿第五人御其母以從僕於洛汭作歌以怨之在位二十九年 按括地志陽夏即今太康縣仲康太康弟嗣天子位即命侯掌六師以征羲和

在位五年

帝相仲康之子既立為羿所逐依同姓諸侯斟灌斟鄩氏徙居商邱後為寒浞所害在位二十七年商成湯姓子氏名履契之後主癸之子湯既即位自商邱徙都於亳任伊尹以國政時夏桀為虐湯修德而諸侯咸服遂興弔伐之師放桀於南巢乃踐天子位國號曰商在位十三年壽百歲 按括地志宋州穀熟縣西南三十五里有南亳故城即湯

都也

太甲湯嫡孫太子太丁子既立不惠於阿衡伊尹
乃放之桐宮三年悔過自責反善伊尹乃復迎歸
而授之政太甲修德諸侯咸歸故稱太宗在位三
十三年

沃丁太甲子既即位伊尹卒乃委任賢臣咎單遂
訓伊尹事作沃丁在位二十九年

太庚沃丁弟在位二十五年

小甲太庚子在位十八年

雍己小甲弟在位十三年

太戊雍己弟既立用伊陟為相亳有祥桑穀共生
於朝一暮大拱太戊懼問伊陟對曰臣聞妖不勝
德帝之政其有闕乎帝其修德太戊從之而祥桑
枯死殷道復興諸侯歸之故稱中宗在位七十六
年墓在今內黃縣西南

仲丁太戊子既立亳都有河決之害乃自亳遷於

蹠在位十有三年 按括地志鄭州滎澤縣西南
十七里即蹠地也

外壬仲丁弟在位五年

河亶甲外壬弟時蹠都又河決乃遷於相在位十
年相今內黃地有亳城

盤庚帝陽甲弟既立而耿都復有河決之害乃自
耿渡河南遷都於亳復居成湯故都因殷民之重
遷作書告諭而百姓始寧修湯之政殷道復興在

位二十二年

小辛盤庚弟在位二十二年

小乙小辛弟在位二十八年

武丁小乙子即位恭默思道夢上帝賚以良弼乃使人以彤旁求於天下得說於傅巖中舉以為相

殷國大治在位五十九年

祖庚武丁子在位十七年

祖甲祖庚弟在位十七年

廩辛祖甲子在位六年

庚丁廩辛弟在位二十一年

武乙庚丁子既立復去亳徙河北在位四年 按

河北即相州州有故殷城屬彰德府疑即亳城

太丁武乙子在位四年

帝乙太丁子在位三十八年

受辛帝乙子即紂暴戾荒淫百姓怨讟於是周武
王率諸侯伐紂陳師牧野紂兵倒戈入鹿臺衣其

寶玉赴火而死周武王既有天下封其子武庚祿父以續殷祀而殷遂亡按牧野衛地今衛輝府同成王名誦后稷之後文王孫武王子初武王都鎬欲營洛而未果至是成王乃命周公成武王之意卜澗水東瀍水西為王城而定鼎於郊鄆是為成周以朝會諸侯在位三十七年按一統志郊鄆即今河南府洛陽縣

平王名宜臼幽王子武王十二世孫自鎬京東遷

雒邑是為東周在位五十一年

桓王名林平王孫父洩未立而卒桓王嗣在位二十三年

莊王名佗桓王子在位十五年

釐王名胡齊莊王子在位五年

惠王名闔釐王子初莊王嬖姬姚生子頹有寵及惠王即位奪其大臣圉以為圉故大夫邊伯等五人作亂謀召燕衛之師以伐惠王惠王奔溫立頹

為王樂及徧舞鄭號君怒伐殺頽復入惠王在位
二十五年 按地理志溫河內溫縣

襄王名鄭惠王子母早死後母曰惠后生子叔帶
有寵於惠王欲立而不克帶與戎狄謀伐襄王襄
王知之欲誅帶帶奔齊後狄人奉帶入周伐襄王
襄王出奔鄭鄭居王於汜狄人因立帶為王襄王
告急於晉晉文公納襄王而誅叔帶奉襄王歸周
襄王乃賜晉文公珪鬯弓矢為伯以河內地與晉

晉復召襄王會於河陽踐土在位三十三年按
地里志汜隸鄭州河陽踐土俱屬懷慶府

頃王名壬臣襄王子在位六年

匡王名班頃王子在位六年

定王名瑜匡王弟元年楚子伐陸渾觀兵於周郊
問九鼎輕重王使王孫滿勞之楚兵乃去在位二
十一年按地理志陸渾即今嵩縣

簡王名夷定王子在位十四年

靈王名泄簡王子在位二十七年

景王名貴靈王子在位二十五年

悼王名猛景王子在位七月為王子朝所弑

敬王名匄景王子猛之母弟晉人逐子朝立之在

位四十四年按括地志故王城本郟鄏周公所

築在洛州河南縣西九里自平王以下十二王皆

都此城敬王遷都成周至赧王又居王城

元王名仁敬王子在位八年

貞定王名介元王子在位二十八年

哀王名去疾定王子在位三月為弟叔襲所弑

思王即叔襲在位五月為弟嵬攻所弑

考王即嵬攻在位十五年

威烈王名午考王子二十三年九鼎震命韓魏趙

為諸侯在位二十四年

安王名驕威烈王子在位二十六年

烈王名熹安王子在位十年

顯王名扁烈王弟在位四十八年

慎靚王名定顯王子在位六年

赧王名延慎靚王子在位五十九年為秦所攻王
奔秦盡獻其邑三十六秦受之歸其君於周是歲
王崩周遂亡

東漢世祖光武皇帝姓劉名秀南陽蔡陽人高祖九
世孫南頓令欽之子初欽為濟陽令以建平元年
十二月甲子夜生帝於縣舍有赤光照室卜者王

長占之曰此兆吉不可言是歲縣界有嘉禾生一莖九穗因名曰秀及長會王莽篡位天鳳末帝避吏新野因賣穀於宛宛人李通以圖讖說之初不敢當然念天下方亂王莽敗亡已兆遂與定謀市兵弩與通從弟軼等起於宛於時海內之士翕然響應乃徇昆陽定陵鄧皆下之是歲九月三輔豪傑共誅王莽傳首詣宛時又有邯鄲卜者王郎稱成帝子百姓多信之遂立為天子帝復率諸將鄧

禹等進攻邯鄲破之大難既平諸將固請即皇帝
位於鄆南定都洛陽帝恢廓大度才明勇略崇儒
術表行義興學校東漢之俗於斯為美焉在位三
十三年壽六十一 按一統志南頓屬汝南郡今
省入項城縣新野屬南陽宛即南陽縣也

明帝名莊光武太子母陰后帝既即位作辟雍創
明堂興禮樂尊賢養老建武永平之政為東京稱
首在位十八年壽四十八

章帝名炟明帝太子母賈貴人帝既即位每事務存寬厚除慘獄之科深元元之愛著胎養之令奉承明德太后盡心孝道平徭減賦人賴其慶又數詔有司課農桑慎選舉理冤獄故藩輔克諧羣后德讓在位十三年壽三十三

和帝名肇章帝太子即位方十歲時實憲專權帝惡而誅之剪除大憝躬親萬幾尊信儒術克納讜言以袁安為三公賢相相繼擢用是以民增土闢

四夷賓服在位十七年壽二十七

殤帝名隆和帝子生始百日即帝位鄧太后臨朝
在位一年

安帝名祜清河孝王慶之子章帝之孫殤帝崩鄧
太后立之是時太后臨朝委政閹宦帝擁虛位而
已在位十九年壽三十三

順帝名保安帝太子即位後黃瓊李固之徒相繼
登用東京之士於茲為盛然宦戚預政雖有賢人

君子不能救漢祚之衰在位十九年壽三十一

冲帝名炳順帝太子年二歲立在位一年

質帝名纘章帝玄孫渤海孝王之子梁太后立之
在位二年為梁冀所弑

桓帝名志章帝曾孫蠡吾侯翼之子質帝崩無嗣
太后與梁冀立之在位二十一年壽三十六

靈帝名宏章帝玄孫解讀亭侯熹之子桓帝無嗣
竇太后立之是時宦寺流孽忠義就戮而漢業衰

在位二十二年壽三十四

獻帝名協靈帝中子董卓廢皇子辯為弘農王遂立之及誅董卓曹操竊柄乃遷都於許帝身播國屯在位三十一年後操子丕篡位奉帝為山陽公按漢書山陽縣名在今懷慶修武縣西北

魏文帝姓曹氏名丕沛郡譙人曹操之子漢中常侍曹騰養子嵩之孫操因亂乘時而興遂移漢祚及卒丕始篡位都於鄴在位七年壽四十六 按一

統志鄴在臨漳縣西二十里

明帝名叡文帝太子嗣位以來褒禮大臣料簡功能屏絕浮偽容受直言吏民上書一日之間至數百封雖文辭鄙陋亦省覽究竟無厭倦焉在位十三年壽三十六

齊王名芳明帝養子不親機務耽於女謁為司馬師所廢在位十四年

高貴鄉公名髦文帝孫東海定王霖之子初封剡

縣高貴鄉公因齊王廢而迎立為帝後見威權日替不勝其忿曰司馬昭之心路人所知也吾不能坐受廢辱今日當自出討之遂拔劍升輦率殿中宿衛蒼頭官僮鼓譟而出中護軍賈充自外迎戰於南闕下太子舍人成濟抽戈刺之髦殞於車下在位七年壽二十一

陳留王名奐武帝孫燕王宇之子初封常道鄉公及高貴鄉公被弑公卿迎立之在位五年禪於晉

因奉為陳留王魏遂亡

晉世祖武帝姓司馬氏名炎河內溫縣人懿之孫昭之子仕魏襲封晉王遂取魏而代之是為晉武帝在位二十五年壽五十五按河內今為縣屬懷慶治溫縣亦屬懷慶府

惠帝名衷武帝太子性慙驕而賈后凶悍多權略每欲干預朝政為太傅楊駿所抑遂搆駿以謀反殺之廢太后毒殺太子趙王倫率兵討之王戎等

奉帝北征至安陽敗績乃幸鄴劉元海復遣人攻之帝單車還洛從齊王同等復討倫殺之乘輿反正明年帝食餅中毒而崩在位十七年壽四十八懷帝名熾武帝第二十五子惠帝無子遂嗣立時劉曜石勒屢攻洛陽帝欲詣河陰為遷都之計乃出西掖門至銅駝街為盜所追而還及曜等入京師焚燒宮廟帝遂蒙塵於平陽劉聰以帝為會稽公在位六年壽三十

愍帝名鄴武帝孫吳孝王晏之子及懷帝被害大臣立以為帝時洛陽傾覆避難於滎陽未幾荀藩等奉帝至長安及長安陷帝出降遂遇害在位四年年十八按滎陽今屬鄭州

後魏孝文帝本姓拓跋氏改姓元氏名宏獻文帝之子始生於平城宮中及嗣位遷都洛陽仁孝恭儉制禮作樂為魏賢主江左五朝皆莫及也在位二十九年壽三十三

宣武帝名洛孝文帝長子弱冠即位不能親決萬
幾委任小人濁亂國政魏氏基業衰於此矣在位
十六年壽三十三

孝明帝名詡宣武帝子即位年六歲母胡太后臨
朝嬖倖用事封疆日蹙太后欲久專政乃鴆殺帝
立其幼主在位十三年壽二十九

孝莊帝名子攸鼓王勰之次子初孝明帝崩胡后
立幼子釗爾朱榮舉兵弑之乃迎帝旣即位榮以

討賊為名實蓄不臣之志帝因刺殺之後爾朱世隆與爾朱兆復弑帝立長廣王奕在位一年壽二十四

節閔帝名恭廣陵惠王羽之子爾朱世隆既弑莊帝迎立之時冀州刺史高歡起兵討爾朱氏入洛陽以節閔帝英毅難制遂廢之在位二年壽三十五

孝武帝名修廣平武穆王懷之子高歡既廢節閔

乃迎帝即位歡專恣帝密謀討之歡覺遂自晉陽擁兵至洛帝奔長安依宇文泰未幾為泰所弑在位三年壽二十五

東魏孝靜帝名善見清河王亶之子孝武既入關高歡至洛陽奉孝靜即帝位因北遷於鄴是為東魏魏於此分為二矣在位十七年禪於齊未幾遇害壽二十八

北齊文宣帝姓高氏名洋歡之子渤海人初受東魏

之禪都於鄴國號北齊在位十年壽三十一

廢帝名殷文宣太子立一年常山王演廢之壽十

七

孝昭帝名演即常山王文宣母弟在位二年壽二

十七

武成帝名湛孝昭介弟初孝昭幸晉陽帝守鄴孝

昭崩遂即位親狎庸豎朝政盡隳在位四年壽三

十三

後主名緯武成子即位後日事游晏委政匪人以
邊警告急授禪太子在位十三年壽二十三

隋煬帝名廣文帝次子初封晉王開皇二十年立為
皇太子仁壽四年弑父自立是年十一月遷都洛
陽留晉王昭守長安以洛陽為東京大業十三年
巡幸江都明年三月為宇文化及所弑在位十三
年壽五十

恭帝名侗煬帝孫元德太子昭第三子大業二年

立為越王帝每巡幸侗嘗留守東都十三年帝幸
江都復令侗總留臺事宇文化及弒逆元文都等
共尊立為帝改元皇泰是時唐公李淵已立代王
侑為帝於長安稱義寧二年矣是年六月唐廢帝
侑為鄭國公明年崩謚曰恭皇帝侗在東都立二
年禪位於王世充尋被弒世充亦偽謚曰恭皇帝
唐武后名曁并州文水人荊州都督士護之女太宗
貞觀十一年召入為才人高宗為太子見而悅之

太宗崩出為尼高宗永徽五年召入宮為昭儀明年遂立為后斷王皇后蕭淑妃手足投酒甕中又斬之嗣是數見王蕭為祟如死時狀不敢居長安高宗崇飾別都以處之以洛陽宮為東都高宗崩中宗立後復廢中宗立豫王旦九月太后改元光宅七年改國號曰周稱皇帝凡僭位二十一年神龍元年張柬之等反正遷后於上陽宮中宗復位是年十一月后崩壽八十一與高宗合葬乾陵

昭宗名晔懿宗第七子始封壽王嗣位十六年車
駕發長安朱全忠毀長安宮至劫帝遷都洛陽壽
三十八

哀帝名祝昭宗第九子始封暉王全忠弑昭宗乃
矯詔立為皇太子天祐初即位於柩前後為梁所
害在位三年壽十七唐遂亡

後梁太祖姓朱氏名溫後更名晃宋州碭山人初從
黃巢為亂既降唐拜汴州刺史宣武軍節度使賜

名全忠後滅唐稱帝以汴州為東都開封府開平
三年復遷都洛陽在位七年為子友珪所弑壽六
十一

末帝名友貞太祖第三子初封為均王及太祖遇
弑乃起義討賊遂誅友珪於洛陽即位於汴未幾
後唐伐之乃自殺而後梁亡在位十一年壽三十
六

後唐莊宗本姓朱邪名存勗沙陀人先世事唐賜姓

李氏父克用初封晉王存勗既襲父爵遂滅梁稱
帝國號後唐遷都洛陽在位三年壽四十二

明宗名嗣源本胡人晉王克用養子佐莊宗定天
下莊宗同光四年奉命討鄴為叛卒擁立引兵向
洛陽及莊宗遇弒遂即位帝性不猜忌與物無競
雖目不知書而其所為暗合古訓年穀屢豐兵革
罕用較於五代粗為小康在位八年壽六十七

閔帝名從厚明宗第五子初封宋王明宗崩帝嗣

位五月潞王兵入洛陽廢之尋復見弑壽二十一
廢帝名從珂本姓王氏鎮州平山人明宗養子初
封潞王既廢閔帝而自立未幾石敬瑭以兵入洛
陽遂自焚死在位二年壽四十五

後晉高祖姓石氏名敬瑭沙陀人明宗之壻初與廢
帝有隙以北京留守借契丹兵入洛遂滅唐即位
國號後晉天福二年遷都於汴仍以汴州為東京
開封府乃割幽薊十六州與契丹在位七年壽五

十七

出帝名重貴高祖兄敬儒之子初封齊王高祖無
嗣大臣迎立之在位四年為契丹執之以歸而後
晉亡

後漢高祖姓劉氏名暉初名知遠其先沙陀部人仕
後晉以功封北平王及出帝被執乃即位於晉陽
遷都於汴國號後漢在位二年壽五十四

隱帝名承祐高祖第二子初封周王嗣位三年被

弒壽二十後漢亡

後周太祖姓郭氏名威邢州堯山人仕後漢為樞密副使以鄴都留守擁兵入汴隱帝遇害遂即位國號後周在位三年壽五十三

世宗姓柴氏名榮邢州龍崗人太祖后兄守禮之子太祖無嗣養以為子後因嗣位取秦隴平淮右考制度延儒碩嘗見均田圖慨然有志於復古在位六年壽三十九

恭帝名宗訓世宗太子初封梁王年七歲嗣位半年禪於宋而後周亡

宋太祖姓趙名匡胤其先涿郡人唐天成二年生於洛陽夾馬營容貌雄偉器度豁如性孝友節儉仕周為殿前都檢點以功進歸德節度使建隆元年遂受禪國號宋都於汴務農興學慎罰薄斂與民休息迄於治平在位十七年壽五十

太宗名匡義賜改光義復改名炅太祖母弟沉謀

英斷好學重儒數從太祖征伐有功封為晉王太祖崩帝遂即位好文守成一統天下在位二十二年壽五十九

真宗名恒太宗第三子初封壽王後立為皇太子繼守承平之業又得李沆寇準為相內外無事四海乂安在位二十五年壽五十五

仁宗名貞真宗第六子初封昇王後冊為皇太子嗣位以來用賢圖治天下晏然恭儉之心仁恕之

德終始如一在位四十二年壽五十四

英宗名曙仁宗從兄允讓第十三子初封鉅鹿郡公以睿哲之資膺繼統之命臨政必問故事與古治所宜每有裁決皆出羣臣意表在位四年壽三十六

神宗名頊英宗長子初封潁王後立為皇太子即位後勵精求治將大有為熙豐間用王安石議行新法用兵西北卒無成功在位十八年壽三十八

哲宗名煦神宗第六子初封延安郡王後立為皇
太子即位初高太后輔政召用諸賢罷廢新法元
祐之政庶幾仁宗及高后崩而黨籍興矣在位十
五年壽二十五

徽宗名佖神宗第十一子初封為端王哲宗無嗣
皇太后立之在位二十五年禪位於太子靖康二
年金陷中原遂北狩至紹興五年殂於五國城壽
五十四

欽宗名桓徽宗太子初封定王金人入寇徽宗遂
禪位又二年金人入中原帝亦北狩後十四年殂
於五國城壽六十一 按宗自太祖至欽宗皆都
汴高宗以後都杭

后妃附

周申后姜姓其先本神農之後分封於申周幽王娶
其女以為后故云申后生太子宜臼後幽王嬖褒
姒廢申后及宜臼故后作白華之詩以警之

漢光武光烈皇后陰氏名麗華新野人初帝適新野
聞后之美心悅之後至長安見執金吾歎曰仕宦
當作執金吾娶妻當得陰麗華更始元年納后於
宛時年十九帝西之洛陽令后歸新野及即位乃
迎后入洛為貴人帝以后雅性寬仁欲崇以尊位
后固辭乃止遂立郭后建武四年從征彭寵生明
帝於元氏十七年始廢郭后而立以為后后在位
恭儉少嗜玩不喜笑謔性仁孝多矜慈自七歲失

父雖已數十年言及未嘗不流涕焉明帝即位尊
后為太后壽六十合葬原陵

和帝皇后陰氏光烈皇后兄執金吾識之曾孫女
后少聰慧善書藝永元四年選入掖庭為貴人八
年立為后十四年坐呪詛事廢遷桐宮以憂卒

和熹皇后鄧氏名綏新野人和帝之后太傅禹孫
女父訓護羌校尉母陰氏光烈后從弟女也后年
五歲太傅夫人甚愛之誦詩論語諸書每讀經傳

趣下意問難母非之后重違母言晝修婦業暮誦經典家人號曰諸生初入掖庭為貴人時年十六恭肅小心動有法度且善事陰后克己以御同列和帝深嘉之後陰后以巫蠱事廢始立后為皇后帝崩殤帝立尊為皇太后壽四十一合葬順陵

安帝皇后閭氏名姬滎陽人元初元年選入掖庭為貴人二年立為后安帝宮人李氏生皇子保后妬之鵠殺李氏譖皇子保廢之為濟陰王立北鄉

侯懿為帝尊后為皇太后後懿卒保立為順帝遷后於離宮以憂卒

桓帝皇后鄧氏名猛和熹皇后從兄子香之女永興中選入掖庭為采女梁后崩始立為皇后八年坐驕忌廢以憂卒

靈帝靈思皇后何氏南陽宛人以選入掖庭生皇子協拜為貴人光和三年立為后後協立尊為皇太后

後漢照烈帝穆皇后吳氏陳留人從兄吳壹入蜀先
主旣立益州而孫夫人還吳於是納后為夫人尋
立為后及後主即位尊為皇太后合葬惠陵

吳主權敬懷皇后王氏南陽人初選入宮嘉禾中得
幸生孫休先卒葬公安及休即位追尊曰敬懷皇
后改葬敬陵

魏主廆明悼皇后毛氏河內人黃初中選入東宮帝
即位以為貴嬪太和元年立為皇后葬愍陵

明元皇后郭氏西平人黃初中本郡叛遂沒入宮
帝即位愛幸拜為夫人後立為皇后塋高平陵

晉明帝明穆皇后庾氏名文君鄆陵人軍諮祭酒璠
之女明帝為太子時聘為妃及帝即位立為皇后
成帝即位尊為皇太后

康帝康獻皇后褚氏名蒜子陽翟人侍中衛將軍
裒之女少以名家入為瑯琊王妃康帝即位立為
皇后穆帝即位尊為皇太后

廢帝孝皇后庾氏名道憐鄆陵人永之女初為東海王妃及帝即位立為皇后葬敬平陵

恭帝恭思皇后褚氏名靈媛陽翟人爽之女初為瑯琊王妃元熙元年立為皇后及帝禪位降為零陵王妃祔葬冲平陵

南宋文帝元皇后袁氏名齊嬌陽夏人左光祿大夫湛之女少適文帝生子劭元嘉十七年崩

後廢帝皇后江氏名簡珪考城人初納為太子妃

及太子立為帝冊為皇后帝既廢降為蒼梧王妃
順帝皇后謝氏名梵境陽夏人車騎功曹颺之女
順帝立冊為皇后及帝禪位降為汝陽王妃

南齊東昏皇后褚氏名令璩陽翟人太常澄之女初
東昏為太子時納為妃及即位立為皇后東昏廢
降為庶人

陳宣帝皇后元氏名樂尚洛陽人開府晟之女入宮
為貴妃後立為皇后帝崩出俗為尼貞觀中卒

後魏明元帝皇后杜氏鄴郡人以良家子選入太子宮中生太武帝拜貴嬪及太武即位尊為皇太后文帝文皇后乙弗氏洛陽人瓊之女文帝納為妃及即位立為皇后後遜居別宮為尼卒

隋文帝文獻皇后獨孤氏名伽羅洛陽人周大司馬衛公信之女初信見文帝有奇表遂妻之及帝受禪立為皇后時突厥嘗與中國貿易有明珠一匣價值八百萬有白后取之者后曰非我所須也當

令外庭屢寇將士罷勞未若以八百萬分賞有功者百寮聞而畢賀仁壽三年崩葬太陵

唐太宗文德皇后長孫氏洛陽人驍騎衛將軍晟之女初歸太宗於藩邸及帝即位立為皇后后喜圖傳視古善惡以自鑒嘗著女則十篇又為論斥漢馬后不能檢抑外家矜尚禮法性約素服御取給則止每遇後庭有被罪者后俟帝意稍解徐為開喻終不令有冤貞觀十年后寢疾太子欲請大赦

汎度道人冀蒙福祐后固止之及大漸請帝勿用起墳但因山而塋所需器物皆以木瓦儉薄為之壽三十六葬昭陵

肅宗皇后張氏鄧州向城人去逸女初入東宮拜淑妃繼立為后能牢籠預政帝大漸后因謀廢太子李輔國等矯詔廢而殺之

宋太祖孝惠皇后賀氏開封人景思之女性溫柔恭順動以禮法初宣祖為太祖聘焉後太祖為節度

使封會稽郡夫人顯德五年崩建隆三年追冊為
皇后

孝章皇后宋氏洛陽人左衛上將軍渥之女乾德
五年太祖召見賜冠帔開寶初納為皇后性柔順
好禮每帝視朝退常具冠帔候接太宗即位后居
西宮至道元年崩

太宗淑德皇后尹氏鄴郡人刺史廷勛女太宗在
川時娶之早薨及帝在位追冊為皇后葬孝明陵

懿德皇后符氏宛邱人魏王彥卿女周顯德中歸
太宗及太宗為晉王封越國夫人開寶元年薨葬
安陵後太宗即位追封為皇后

仁宗溫成皇后張氏河南永安人進士堯封女初
入宮為才人皇祐初進貴妃後五年薨追冊為皇
后

昭節貴妃苗氏開封人繼宗女初侍仁宗拜昭容
德妃後英宗即位念妃有擁佑功進貴妃元祐六

年薨

昭淑貴妃周氏開封人初張貴妃育以為女稍長
遂得侍仁宗及崩妃每日蔬食屏處徽宗立加貴
妃

神宗欽聖皇后向氏河內人故相敏中曾孫女治
平三年歸於潁邸封安國夫人及神宗即位立為
皇后哲宗立尊為皇太后徽宗立請權同處分軍
國事后以長君辭帝泣拜移時乃聽凡紹聖以還

所斥逐賢大夫士稍稍收用之每聞賓召故老寬
徭息兵愛民崇儉之舉則喜見於色纔六月即還
政云

欽成皇后朱氏開封人熙寧初入宮為神宗侍御
進婕妤生哲宗即位尊為皇太妃崇寧元年薨追
冊為皇后陪葬永裕陵

欽慈皇后陳氏開封人初入宮為神宗侍御生徽
宗進美人未幾薨建中靖國初追冊為皇后陪葬

永裕陵

哲宗昭慈皇后孟氏洛州人太尉元之孫女初高
太后選入宮教以女儀元祐間冊為皇后紹聖三
年為姦黨誣搆廢居瑤華宮元符末以公議詔復
位號入居大內號元祐皇后崇寧初姦閹郝隨諷
蔡京復奏廢欽宗立再復后號二帝北狩后于東
京垂簾發詔冊立高宗南渡後尊為隆祐太后定
苗傅亂年五十九崩

徽宗顯恭皇后王氏開封人刺史藻之女初歸徽宗於端邸封順國夫人及徽宗即位冊為皇后生欽宗大觀二年崩葬裕陵之次

顯肅皇后鄭氏開封人直省官紳之女侍徽宗於端邸累進貴妃政和年冊為皇后及欽宗受禪尊為太上皇后從徽宗北狩

顯仁皇后韋氏開封人初入宮為侍御累遷婉容生高宗從徽宗北狩及高宗即位遙尊為宣和皇

后紹興十二年歸於禁中年八十崩

欽宗仁懷皇后朱氏祥符人節度使伯材女初為太子妃欽宗即位立為皇后從帝北狩守節墮井而死遙上尊號附於太廟

高宗憲節皇后邢氏祥符人朝請郎渙之女初歸高宗於康邸封嘉國夫人及高宗即位立為皇后憲聖皇后吳氏開封人近之女初高宗在維揚納之累進婉儀後進貴妃紹興十三年立為皇后孝

宗即位尊為皇太后后嘗繪古烈女圖置座右為
鑒又取詩序之義扁其堂曰賢志慶元三年崩葬
永思陵

賢妃潘氏開封人永壽女初高宗在藩邸納之及
即位生元懿太子進位賢妃紹興十八年薨

貴妃張氏祥符人累封婉容淳熙七年封太上皇
淑妃再進貴妃紹興元年薨

孝宗成穆皇后郭氏祥符人奉直大夫直卿之孫

女初孝宗納之封咸寧郡夫人紹興二十六年薨
後孝宗即位追冊為皇后諡恭讓尋改成穆

光宗慈懿皇后李氏安陽人節度使道之女初為
光宗元妃生寧宗及光宗受禪立為后寧宗立尊
為太上皇后

寧宗恭淑皇后韓氏相州人忠獻王琦七世孫女
初歸寧宗於平陽郡邸封新安郡夫人及寧宗受
禪冊為皇后

明仁宗誠孝恭肅皇后張氏永城人彭城侯麒之女
永樂中選為東宮妃洪熙元年立為后未幾仁宗
崩后歷宣英二廟至正統七年崩

熹宗懿安皇后張氏祥符人太康伯國紀之女天
啓初選入宮冊為皇后崇禎初上徽號曰懿安皇
后十七年流賊破京城后即自縊於宮中

河南通志卷五十三

欽定四庫全書

史部
河南通志卷五十四

詳校官監察御史臣莫瞻菴

檢討臣德生覆勘

總校官編修臣王燕緒

校對官助教臣蔡鎮

謄錄監生臣朱鎮

欽定四庫全書

河南通志卷五十四

名宦上

昔遷史不為子產作傳而列於循吏言循吏之難其人也循名責實豈不然乎哉漢宣帝刻意吏治每二千石有治理效輒以璽書勉勵增秩賜金公卿缺則選諸所表以次用之故漢世良吏於茲為盛然尚有務為虛名以蒙顯賞者蓋名實相副之難如此

河南自召公卹伯以來甘棠之思陰雨之膏代有其人至我

皇上益加整飭銓選州縣吏親

賜召問或

令督撫大僚試用考察所行以質其言其有功績顯效
方授以職尤異者則不次拔擢之故吏治蒸蒸邁
於前古蓋上作則下必應三代聖王登崇俊良黎
民又安用此道也列史舊有循吏傳茲特舉周漢

以來迄於今吏治之卓卓可稱者著諸編亦循名責實之義也志名宦

總部

周周公旦姬姓大王子成王七年二月欲建成周使召公奭先之洛相土其三月旦往營洛邑遂定鼎于郊鄆卜世三十卜年七百是為東都

召公奭姬姓成王時奭為三公與周公旦營洛邑以成先志洛邑既定乃命奭主陝以西之地自侯

伯至庶人各得其所無失職者後夷去國人思之
而賦甘棠

君陳周公子公遷殷民於下都親往監之既歿成
王命君陳往代策命之詞有君陳篇

畢公高文王子弼亮四世康王十三年命畢公以
成周之衆保釐東郊旌別淑慝克成厥終

召公虎奭之孫宣王命虎築城于謝以封申伯虎
乃徹其土田使申伯世執其成令人稱羅山田猶

曰召伯徹

富辰周大夫初鄭文公伐滑襄王為滑請鄭不聽
王怒命頹叔以狄師伐之辰固諫不從狄伐鄭勝
之王德狄以其女隗氏為后辰又諫王弗聽後太
叔通于隗氏王替隗氏頹叔懼狄怨己乃以狄師
攻王辰曰昔吾諫王王不從以及此難若我不出
王其以我為懟乎乃以其屬死之

王孫滿頃王孫為周大夫定王元年楚子伐陸渾

之戎遂至于雒觀兵周疆定王使滿勞之楚子問
鼎之大小輕重焉滿曰在德不在鼎天祚明德有
所底止成王定鼎于郊鄆卜世三十卜年七百年
所命也周德雖衰天命未改鼎之輕重未可問也
楚子乃還

叔興周內史襄王二十年晉文公獻楚捷於王王
使叔興命晉侯為方伯晉侯受命唯謹叔興歸告
于王曰晉不可不善也其君必伯不逆王命敬奉

禮義王其善之從之使於晉者道相逮也二十四
年王出居于鄭晉侯興師殺叔帶而納王

莢弘周大夫敬王十年弘與劉文公欲城成周乃
告于晉時魏獻子為政遂合諸侯之大夫以城焉
十四年晉會諸侯盟于臯鼫弘與劉子咸在焉晉
侯將長蔡侯於衛衛侯使祝佗言於弘弘告劉子
與范獻子謀之乃長衛侯後莢弘為晉人反間而
死周人藏其血三年化為碧

漢張敞字子高平陽人宣帝時為豫州刺史數上事
有忠言帝嘉之徵為大中大夫與于定國並平尚

書事

宣秉字巨公雲陽人建武元年拜御史中丞光武
特詔御史中丞與尚書令會同並專席而坐故京
師號曰三獨坐明年遷司隸校尉務舉大綱簡略
苛細百僚敬之秉性節約布被疏食帝嘗幸其府
舍嘆曰楚國二龔不如雲陽宣巨公賜帳帷什物

拜大司徒

范遷字子廬沛國人明帝時為河南尹有清行不蓄財利死之日家無擔石

鐔顯潼川州人安帝末為豫州刺史時天下饑民多為盜有司收捕且萬餘人顯憫其困窮故陷刑辟輒釋去因自奏劾帝甚嘉之

周暢字伯通安城人安帝末為河南尹時夏旱久禱無應暢因收塋洛城旁客死骸骨凡萬餘人應

時澍雨歲乃豐稔

楊秉字叔節華陰人震之子桓帝時為豫州刺史計日受俸餘祿不入私門有吏齎錢百萬遺秉閉門不受時稱廉潔

周景字仲饗廬江舒人桓帝時為豫州刺史好賢愛士拔才薦善常若不及每至歲時延請舉吏入上後堂與共宴會如此數四乃遣之贈送什物無不充備既而選其父兄子弟事租優異嘗稱曰臣

子同貫若之何不厚

房植字伯武清河人桓帝時為河南尹有名當朝鄉人為謠曰天下規矩房伯武

馮鯤字鴻卿巴郡宕渠人延熹中為河南尹上言舊典中官子弟不得為牧人職帝不納

劉祐字伯祖中山安國人延熹中為河南尹時權貴子弟每至界首輒改易輿服而行其敬憚如此李膺字元禮襄城人延熹二年徵為河南尹時宛

陵大姓羊元羣罷北海郡賊罪狼籍膺表欲按其
罪元羣略宦豎膺反坐輸作左校司隸校尉應奉
上疏理膺曰竊見左校弛刑徒前河南尹李膺執
法不撓誅舉邪臣肆之以法衆庶稱宜陛下猥受
譖訴不蒙降恕遐邇觀聽為之歎息帝納其言即
拜膺為司隸校尉時張讓弟朔為野王令貪殘不
道聞膺至乃逃匿讓第舍合柱中膺率吏卒破柱
取朔付洛陽獄受辭畢即殺之自此黃門常侍皆

屏氣不敢復出宮省帝問故皆叩頭泣曰畏李校尉

黃琬字子琰江夏安陸人中平初為豫州牧時寇賊陸梁州境彫殘琬討擊平之威聲大震政績為天下表封關內侯

王允字子師太原祁人中平初黃巾賊起拜允為豫州刺史辟荀爽孔融等為從事奏除黨禁討擊黃巾別帥大破之降數十萬人州境澄清民免荼

毒

李燮字德公漢中南鄭人固之子靈帝時為河南尹時既以貨賂為官詔書復橫發錢三億以實西園燮上書陳諫辭義深切帝乃止燮在職二年卒時人感其世篤忠貞咸傷惜焉

羊陟字嗣祖太山梁父人靈帝時為河南尹計日受俸常食乾飯茹蔬禁制豪右京師憚之會黨事起免官

何進字遂高宛人靈帝時為河南尹中平初黃巾賊張角等起以進為大將軍屯兵都亭以鎮京師角黨馬元義謀起洛陽進發其奸以功封慎侯何苗進之弟靈帝時為河南尹中平四年滎陽巨盜數千人羣起攻燒郡縣殺中牟令詔使苗出擊之苗攻破羣賊拜為車騎將軍

朱儁字公偉會稽人獻帝時拜河南尹時董卓擅政以儁宿將外甚親納而心實忌之及關東兵盛

卓懼數請公卿會議徙都長安儁輒止之卓雖惡
儁異已然貪其名重乃表遷太僕以為己副儁不
肯受乃止及卓入關留儁守洛陽而儁與山東諸
將約為內應既而懼為卓所襲乃棄官奔荊州卓
以弘農楊懿為河南尹守洛陽儁聞復進兵還洛
懿走乃移書州郡請師討卓後卓伏誅陶謙與諸
豪傑共推儁為太師

三國賈逵字梁道襄陵人魏黃初中為豫州刺史考

績二千石以下阿縱不如法者悉奏罷之帝稱真
刺史布告天下當以豫州為法賜爵關內侯州南
與吳接達明斥堠繕甲兵吳不敢犯外修軍旅內
治民事造新陂又斷山溜長谿水造小弋陽陂又
通運渠二百餘里所謂賈侯渠也後卒謚曰肅侯
吏民追思為立祠刻石

王沉字處道太原晉陽人貞元中為豫州刺史沉
尋善政按賈逵以來法制禁令諸所施行擇其善

者而從之於是九郡之士咸悅德教累封博陵郡公

劉靖沛國相人黃初中為河南尹初雖如碎密終於百姓便之

傅嘏字蘭石泥陽人魏正始中拜河南尹其治以德教為本然持法有恒簡而不可犯見理識情獄訟不加槓楚而得其實不為小惠有所薦達及大有益於民事皆隱其端迹若不由己出故當時無

赫赫之名吏民久而思之

晉樂廣字彥輔涑陽人泰始中為河南尹先是河南
官舍多怪前尹皆不敢處正寢廣居之不疑嘗外
戶自閉左右皆驚廣獨自若顧見牆有孔使人掘
牆得狸而殺之其怪遂絕廣為政無當時功譽然
去職遺愛為人所思

王祥字休徵琅琊臨沂人高貴鄉公時為司隸校
尉以討毋邱儉功增邑四百戶遷太常封萬歲亭

侯後武帝即位拜太保進爵為公

杜預字元凱京兆杜陵人咸寧中拜鎮南大將軍
都督荊州諸軍事屯守南陽預乃修召信臣遺迹
激用洩渚諸水以浸原田萬餘頃分疆刻石使有
定分公私同利衆庶賴之號為杜父歌之曰後世
無叛由杜翁誰識智名與勇功後徵為司隸校尉
加位特進行次鄧縣卒時年六十三追贈開府儀
同三司諡曰成

劉溫羨字長卿太原祁人惠帝時以尚書郎出為
豫州刺史早有時名在官清白吏畏民愛入拜散
騎常侍

索靖字幼安燉煌人太安末河間王顥舉兵向洛
陽拜靖後將軍使持節監洛城諸軍事與顥戰大
破之靖亦被傷而卒追贈太常

李矩字世迴平陽人永嘉初為司州刺史時弘農
太守尹安振威將軍宗始等四軍並屯洛陽交相

疑阻莫有固志矩與河內太守郭默各遣千騎至洛以鎮之安等乃同謀告石勒勒遣石生率騎五千至洛陽矩默軍皆退還俄而安等復背勒遣使迎矩默矩默又遣步卒五百人入洛石生以安等相謀不自安乃收宗始一軍渡河而南百姓相率歸矩于是洛中遂定

祖逖字士雅范陽人元帝時拜豫州刺史會石勒縱兵掠境逖追擊于汴水大敗之遂授逖節度逖

愛人下士雖疎交賤隸皆思禮遇之由是黃河以
南皆為晉土百姓置酒歌曰幸哉遺黎免俘虜三
辰既朗遇慈父玄酒忘勞甘瓠脯何以詠思歌且
舞一日妖星見于豫州之分遯見曰為我矣俄卒
於雍邱年五十六豫州士女若喪考妣為之立祠
劉毅字仲雄彭城沛人義熙末拜豫州刺史時劉
雅反毅遣將平之

南北朝夏侯夔字季龍譙郡人梁大通六年為豫州

刺史豫州積歲連兵人頗失業夔乃率軍于蒼陵
立堰溉田千餘頃歲收穀百餘石以充儲備兼贍
貧人境內賴之夔兄亶先經此任至是夔又居焉
兄弟並有惠政百姓歌之曰我之有州頻得夏侯
前兄後弟布政優優在州七年卒贈侍中安北將
軍諡曰桓

于栗磾代人元魏永興中為豫州刺史時洛陽城
闕蕭條野無烟火栗磾刊闢榛荒勞來安集甚得

百姓之心太宗南幸盟津詔栗磾曰河可橋乎栗
磾曰杜預造橋遺事可倣乃編次大船構橋於冶
坂六軍既濟帝深嘆美之

張普惠字洪賑常山九門人元魏太和間為東豫
州刺史時淮南九戍十三郡因梁前弊別郡異縣
之人錯雜居止普惠乃依次括比省減郡縣上表
陳狀詔許之宰守由是綰攝有方姦盜不起民以
為便普惠不營財產好有進舉孝昌元年卒于州

高道悅字文欣遼東新昌縣人元魏太和間以御史中尉留守洛京時初基廟庫未備車駕將由水路幸鄴詔都水官營構大材以造舟楫道悅表諫以為缺居宇之功作游嬉之用損耗殊倍又深薄之危古今共慎于是帝遂從陸路還

王肅字恭懿瑯琊臨沂人元魏太和中為豫州刺史善於撫綏治有聲稱嘗于四望陂築城以禦梁繇是梁刺史羊鴉仁以糧運斷絕遂棄懸瓠城而

去

寇雋字祖雋上谷人周正光二年為梁州刺史時民俗荒獷多為盜賊雋乃令郡縣立庠序勸其耕桑敦以禮讓數年中風俗頓革雋在州清苦不治產業秩滿其子等並徒步而還吏人送雋留連于道久之乃得出界

曹世表字景昇魏人元魏正光中為豫州刺史值湛僧珍為亂州民劉獲等為之內應時賊衆彊驛

使不通諸將皆欲退世表乃簡選兵馬出賊不意
一戰破之斬首傳京師還朝加左將軍

平鑒字明達燕郡薊人元魏孝昌末為懷州刺史
鑒請于州西故枳關道築城以防西軍從之尋敵
楊標來攻時新築之城糧糗未集素乏水南門內
有大井隨汲即竭鑒具衣冠俯井而祝至旦井泉
湧溢有異于常將士賈勇遂敗標以功進開府儀

同三司

司馬悅字慶宗仕元魏為豫州刺史汝南有董毛
奴者齎錢五千死于道疑張湜劫殺湜懼掠誣服
悅引見毛奴兄靈之詢當時所遺曰惟一刀鞘召
刀匠詢之知為董及祖刀收及祖詰之果伏罪
庾岳延代人元魏時相州刺史執法平當百姓稱
之鄴舊有園池時果初熟丞吏送之不受曰未進
御吾何得先食其謹如此

高允字伯恭渤海蓐人元魏懷州刺史年將九十

矣歲時行縣問民疾苦尤勸力學風化頗行後去
職郡中為立祠于野王南樹碑紀德焉

盧賁字子徵范陽涿人仕周為懷州刺史嘗決沁
水東注名曰利人渠又支派入溫縣名曰溫潤渠
以溉瀉鹵人資其利焉

于翼字文若代人周建德間為陝州刺史從大軍
東討河南九州三十鎮一時俱下至襄城襄城民
庶喜翼至壺漿迎於道尋即除洛懷等九州諸軍

事

獨孤永業字世基中山人北齊乾明初累遷洛州
刺史又轉左丞刺史如故宜陽深在敵境周人於
黑澗築城戍以斷糧道永業亦築鎮以抗之治邊
甚有威信遷行臺尚書至河清三年周人寇洛永
業恐刺史段思文不能自固馳入金墉助守周人
為土山地道曉夕攻戰經三旬大軍至寇乃退永
業久在河南善於招撫歸降者萬計選二百人為

爪牙作先鋒每以寡敵衆周人憚之

隋令狐熙字長熙燉煌人開皇初帝祠太山還次汴州惡其殷盛多有姦俠於是拜熙為汴州刺史下車禁游食抑工商民有向街開門者杜之舩客停於郭外星居者勒為聚落僑人逐令歸本其有滯獄並決遣之令行禁止稱為良政上聞而嘉之顧謂侍臣曰鄴都天下難理處也勅相州刺史豆盧通令習熙之法其年入朝考績為天下最賜帛三

百疋

唐任瓌廬州合肥人高祖武德初為河南安撫大使
比至宋州會徐圓朗反副使柳濬勸其退保汴瓌
笑曰公何怯耶老將居邊久自當有計俄賊陷楚
邱將圍虞城瓌遣崔樞張公謹等擊之賊遁去

夏侯端壽州人高祖時為河南道招慰使會亳州
二州已降王世充道塞無所歸世充遣人以吏部
印綬召端端叱之曰吾天子使寧污賊官耶即焚

其書乃解節旄懷之由間道歸體髮俱焦入謁帝
憫之拜秘書監

李勣字茂功曹州離狐人武德初為河南大總管
時徐圓朗叛上命勣討平之

楊恭仁隋宗室武德末為洛州都督太宗嘗謂之
曰洛陽要重任難其人故以委公恭仁至政務大
體不事苛察性冲厚以禮自閑未嘗與物忤時人
方之漢石慶云

蕭瑀字時文後梁明帝子太宗時拜河南道巡省
大使以稱職聞復召入叅預政事

狄仁傑字懷英并州太原人高宗時為豫州刺史
會越王兵敗支黨餘二十人論死仁傑奏釋之悉
謫戍邊始宰相張光輔討越王軍士恃功多暴索
仁傑拒之光輔怒曰州將輕元帥耶仁傑曰亂河
南者一越王耳公董士三十萬以平亂而乃縱使
暴橫是一越王死百越王生也且殺降為功寃痛

徹天願得上方斬馬劍加君頸雖死不恨也光輔
還奏仁傑不遜左授復州刺史徙洛州司馬萬歲
通天中徙魏州刺史時河北以契丹數犯境乃驅
民守城民甚苦之仁傑至悉縱就田敵聞亦引去
民愛仰之為立生祠

宋務光字子昂汾州西河人武后時以監察御史
巡察河南道適境內滑州七縣而分封者五王賦
少於侯租入倍於輸國請以封戶均餘州又請食

賦附租庸歲送停封使息傳驛之勞不見納後以
考最進殿中侍御史

王志愔博州聊城人景雲初授河南道按察使破
碎奸猾令行禁信境內肅然

陸餘慶蘇州吳縣人開元初為河南河北道宣撫
使博訪後彥嘗薦達奚珣等于朝後皆為知名士
顏真卿字清臣萬年人天寶末為河北招討採訪
使時賊將袁知泰守魏郡真卿遣大將李擇交等

攻之知泰敗走累遷吏部尚書及李希烈陷汝州
盧杞乃建議遣真卿往諭之希烈留軍中真卿抗
節不屈死贈司徒諡文忠

張介然猗氏人天寶末為河南節度採訪使守陳
留陳留處水陸衝劇居民孳夥而太平久不知戰
介然到屯不三日而安祿山已渡河矣士聞鉦鼓
聲皆褫氣不能授甲凡旬有六日城陷介然死之
李光弼營州柳城人天寶末為河北節度度支營

田經略等使與九節度兵圍安慶緒於相州大戰
鄴西敗之史思明因殺慶緒縱兵攻汴州節度使
許叔冀降賊乘勝西向光弼悉軍赴河陽排閱守
備號令嚴明賊憚威略屯白馬寺南築城以守已
而賊攻中潭城光弼大破逆黨五千餘衆賊又攻
南城遣李抱玉破之賊復整軍向北城光弼登城
望曰彼軍雖衆然方陣而踞不足懼也乃督諸將
出戰光弼自麾旗者三一鼓而賊大潰斬萬餘級

生擒八千餘人以功進爵臨淮郡王

張鎬字從周博州人肅宗初為河南節度使都統淮南諸軍事時賊圍宋州張巡告急鎬倍道進檄濠州刺史閻邱曉趨救曉逗留不肯進比鎬至淮口而巡已陷鎬怒杖殺曉帝還京師封南陽郡公詔以本軍鎮汴州捕平殘寇鎬又言史思明不可假以威權許叔冀狡獪宜追還宿衛俱不報

來瑱邠州永壽人天寶間累官山南東道節度使

會賊圍南陽急瑱與魏仲犀合兵救之不勝人情
恟懼瑱能撫訓士卒舉動安重賊不得侵改淮南
西道節度使

魯炅幽州薊人天寶末為山南節度使安祿山叛
屯守南陽賊圍之城申食盡斗米五十千一鼠四
百饑者相枕籍被圍凡一年晝夜備戰人至相食
卒無救援至德二載五月乃率衆突圍走襄陽田
承嗣尾擊炅殊死戰二日斬獲甚衆賊引去時賊

欲南侵江漢賴炁遏其衝要南夏得全俄拜御史大夫襄鄧十州節度使

田神功冀州南宮人天寶末為河南節度汴宋八州觀察使初賊圍宋州神功率師往救賊解去又破法子營既寢疾宋之將吏為設八關齋報恩後力疾入朝而卒贈司徒詔其弟曹州刺史神玉知汴州

哥舒曜字子明安西人翰之子玄宗時拜東都鎮

守兵馬使德宗立召為龍武大將軍及李希烈陷
汝州以周晃為偽刺史詔曜為東都汝州行營節
度使召見問曰卿治兵孰與父賢對曰臣安敢與
先臣比但斬長蛇殪封豕然後待罪私室臣之願
也帝曰爾父在開元時朝廷無西憂今朕得卿亦
不東慮曜果擊賊汝州擒晃以獻斬其將二人希
烈退保許州

劉晏字士安曹州南華人代宗末領東都河南江

淮轉運租庸鹽鐵常平使時大兵後京師米斗千
錢農家授穗以輸晏自按行由汴入河觀三門遺
跡至河陰鞏洛見梁公堰通濟渠及李傑新隄盡
得其利病乃移書宰相歲致關中粟四十萬斛帝
勞曰卿朕鄴侯也遷吏部尚書

張延賞蒲州猗氏人大歷初為河南諸道營田副
使河洛當兵衝邑里榛莽延賞輕徭賦疏河渠築
宮廟數年流逋歸附城闕完飭有詔褒美旣而留

守東都治行第一子弘靖亦廕為河南叅軍徙宣武節度政令寬簡民咸安之

李勉字元卿鄭惠王元懿曾孫代宗時為汴宋節度使時汴將李靈曜反魏將田悅與合兵屯於汴勉與李忠臣馬燧合討之戰于匡城賊潰悅走河北靈曜奔韋城俱為勉所獲獻俘闕下德宗立詔勉為汴宋滑毫河陽等道都統

曲環陝州安邑人德宗時為陳許節度使二州比

為寇衝民苦剽虜客他縣環勤身節用寬賦斂簡
條教不三歲歸者甚衆訓農治兵穀食豐衍轉檢
校尚書左僕射

韓弘滑州匡城人貞元中為宣武節度副大使知
節度事時曲環死吳少誠與全諒謀襲陳許使數
輩仍在館弘至欲以忠自表于衆即驅出少誠使
斬之仍選卒三千會諸軍擊少誠敗之

呂元膺字景夫鄆州東平人德宗時為東都留守

都有李師道留邸邸兵與山棚謀竊發事覺元膺禽破之始盜發都人震恐守兵弱不足恃元膺坐城門指縱部分意氣閑舒人賴以安

李泌字長源京兆人貞元初為陝虢觀察使泌始鑿山開車道至三門以便鑲漕以勞進檢校禮部尚書

董晉字混成河中虞鄉人貞元中為宣武節度副大使知節度事汴士素驕怙亂嘗介勇士伏幕下

早暮畚休晉一切罷之初節度李萬榮死鄧惟恭
謀代及晉至則鞅鞅不能平乃結大將相里重晏
等謀亂晉覺之殺其黨械送惟恭京師詔拜汝州
刺史

李愬字元直洮州臨潭人憲宗時為唐鄧節度使
命討蔡初高霞寓屢北蔡人易之不為備會得賊
將李祐愬待以客禮問襲蔡之謀謀既定遣告裴
度師期愬夜率中軍三千以祐為前鋒田進誠以

下軍殿出文城柵會大雨雪天晦夜半至懸瓠城
賊恃吳房朗山戍晏然無知者祐等坎墉先登衆
從之黎明雪止愬入駐元濟外宅蔡吏驚曰城陷
矣元濟尚不信及聞號令乃率左右登牙城拒戰
進誠兵薄之火南門元濟請罪梯而下檻送京師
其黨二萬皆降愬不戮一人還屯文城柵有詔進
檢校尚書左僕射山南東道節度使封涼國公實
封戶五百

烏重脣字保君張掖人憲宗時為河陽節度使王師討蔡詔重脣以兵壓賊境割汝州隸其軍與李光顏相犄角大小百餘戰凡三年賊乃平遷檢校司空進邠國公重脣出行伍善撫士與下同甘苦初蔡將李端隆重脣蔡人執其妻鬻而殺之妻臨死猶呼曰善事烏僕射其得人心如此

馬總字會元扶風人憲宗時為彰義軍節度使值吳元濟初禽蔡人習偽惡相告訐獷戾不馴總為

設教令明賞罰磨治洗汰其俗一變始奏改彰義
為淮西尋擢拜淮西節度使

田布字敦禮平州盧龍人弘正之子憲宗時為河
陽節度使布至省兄將募戰卒寬賦勸穡人皆安
之

崔咸字重易博州博平人元和間為陝虢觀察使
日與賓客僚屬痛飲未嘗醒夜分輒決事裁剖精
明無一毫差吏稱為神

韓充滑州匡城人弘之弟穆宗時為宣武軍節度使統義成兵討李齊戰郭橋破之會李質斬齊先入汴充馳至汴城下汴人望見充歡躍無復貳者始帝遣人問破賊期充對汴天下咽喉臣頗習其人然王師臨之一月可破方二旬即克帝喜曰充料敵如神加檢校司空籍齊所脅為兵者三萬悉縱之又責首亂者千餘人斥出境令曰敢後者斬由是内外安堵汴人賴之

崔宏禮字從周博陵人長慶初為河陽節度使治河內秦渠溉田千頃收八萬斛累遷東都留守

李絳字深之趙郡贊皇人穆宗時拜東都留守當洛中頽靡之久嚴於蒞政入補太常卿後為賢宰相

令狐楚字殼士宜州華原人敬宗時為宣武節度使先是韓弘弟兄以汴軍素驕務峻法繩治士偷于安無革心楚至不事酷烈以仁惠開諭人皆悅

喜遂為善俗

李德裕字文饒贊皇人文宗時以太子賓客分司
東都政尚寬和得士庶心

溫造字簡與并州祁人太和中為河陽節度使奏
復懷州古秦渠枋口堰以溉濟源河內溫武陟四
縣田五千餘頃民咸賴其利

敬昕河中河東人武宗時為河陽節度使朝命王
宰兼河陽行營攻討使以扞敵昕饋餉不絕

劉沔字子汪徐州彭城人武宗時為義成軍節度使會劉真叛攻討使王宰率兵逗留宰相李德裕表沔鎮河陽以滑兵二千壁萬善居宰肘腋下激之俾出軍真平進檢校司徒

石雄徐州人武宗時以平劉真進檢校兵部尚書徙河陽節度使初雄討真水次見白鷺謂衆曰使吾射中其目當成功一發如言帝聞下詔褒美

盧鈞字子和京兆藍田人宣宗時為東都留守邀

游林墅冥心榮進臥護留鑰門庭肅然尋代劉鈞
為宣武節度使

李珣字待價趙郡人宣宗時為河陽節度使罷橫
賦宿逋百餘萬以吏部尚書召珣去鎮而府庫十
倍于初

韋澳字子裴杜陵人宣宗時為河陽節度使政尚
安靜懿宗立徙平盧軍

崔安潛字進之齊州全節人咸通中為忠武節度

使王仙芝寇河南安潛募人繕器械號令精明賊畏之不敢犯陳許境又使大將張自勉將兵七千援宋州時宋威屯曹州官軍數却賊圍宋益急自勉收南月城斬賊二千級仙芝夜解去

五代符彥卿字冠侯宛丘人存審之子晉天福間為河陽三城節度使遼人南侵詔彥卿率所部軍拒戰澶淵契丹騎兵數萬圍高行周于鐵邱諸將莫敢當其鋒彥卿獨引數百騎擊走之行周得免

王朴東平人周世宗征淮以朴留守京師朴外事征伐內修法度廣新城通道路京師之制多其所規為天歷六年春世宗遣朴行視汴口作斗門還過故相李穀第疾作仆於坐上昇歸而卒

宋張永德并州陽曲人太祖時為武勝軍節度使尋加侍中鄧人愛之如父母太平興國六年進封鄧國公咸平初分司西京二年契丹入寇帝將北征詔永德留為東京內外都巡檢使三年制授檢校

太師彰德軍節度使俄以衰老歸洛而卒

曹彬字國華真定靈壽人太祖時為忠武軍節度使每出中途遇朝紳必引軍避過市戢其傳呵戒導吏云馬不得越十輪恐壅過市井其仁恕清謹如此

高瓊字實臣亳州蒙城人沉勇有大略太宗時為許州都指揮使有亡命卒謀作亂瓊選卒數十人襲賊賊注矢射瓊瓊一發斃之遷御前忠佐馬步

都軍頭真宗景德初契丹入澶州寇準倡議親征
或勸南遷瓊進曰敵師已老陛下宜親往督戰不
宜退縮以阻士氣遂下馬扶輦擁衆渡河衆望見
皆呼萬歲聲聞數十里契丹奪氣遂定盟還賜宴
行宮未幾以疾辭拜忠武軍節度使三年薨於建寧
里第葬開封府開封縣吹臺鄉建邑里後追封衛
王諡烈武翰林學士王珪誌其墓

劉綜虞鄉人至道末為河北轉運副使會河北承

兵寇之後民戶凋敝州縣官皆四方人不習風俗
且有懷土之思政事多因循不舉綜建議請自令
並以河朔人充之冀其安居勤於職事從之再為
河北轉運使時邊事煩急轉漕重任尤所倚辦綜
繼領其職號為練達景德初召拜樞密直學士

曹璨字韜光彬之子天禧初授河陽節度使善撫
士卒兼著威愛有父風

張存冀州人仁宗時為河北都轉運使會契丹與

元昊締婚約聚兵塞上存言河北諸城久不治所
宜留意上善之乃命存盡城諸州民恃以不恐召
入知開封府

陳希亮眉州人嘉祐間為京西轉運使時石塘河
役兵叛其首周元自稱周大王震動汝洛間希亮
聞之即日輕騎出按吏請以兵從不許其部賊二
十四人道遇希亮遂列訴所苦希亮徐問訖命一
老兵押之曰以是付葉縣聽吾命既至令曰汝以

自首皆無罪然必有首謀者衆不敢隱乃斬元以徇流軍校一人餘悉遣赴役如初

李綱字伯紀無錫人宣和末為東京留守金人犯汴綱身督戰募壯士縋城而下斬首領十餘人殺其衆數千金人乃退求和綱議扼要害絕糧道以復畿北郡縣宰執不從遂乞休時詣闕留者至搥破登聞鼓乃復其秩既而言者謂綱專主戰議喪師費財於是落職責授保靜節度副使建昌郡安

置綱又上疏辨論再謫江寧府高宗即位詔還除
資政殿大學士領開封府事時綱行次長沙聞命
率湖南勤王之師入援上遣使趨見進對內殿綱
條陳時政前後凡百餘疏俱不能行卒贈太師諡
忠定

宗澤字汝霖婺州義烏人靖康初知磁州繕城浚
池治器募勇為固守之計上嘉之除河北義兵都
總管金人寇磁州澤登城令壯士以神弩射走之

有詔以澤為副元帥未幾除京城留守兼開封府尹澤乃於京城四壁各置使以領招集之兵又據形勢立堅壁二十四所於城外沿河鱗次為連珠若于是金人屢戰不利遂徙去澤因請回鑾以固人心凡二十四疏俱為黃潛善汪伯彥所抑遂憂憤疾作而卒贈觀文殿學士諡忠簡

張所青州人建元初為河北招撫使賜內府錢百萬緡給空名誥千餘道以京西卒二千為衛將佐

官屬許自辟置所方招來豪傑以王彥為都統制
岳飛為準備將而汪伯彥黃潛善惡之誣奏安置
嶺南而卒

金布薩揆上京人章宗時為宣撫河南軍民使賜以
名馬玉帶揆至汴蒐練將士軍聲大振及上秋獵
賜以親獲鹿尾舌未幾召還

宗辰中都宛平人貞祐二年為沁南軍節度使正
月元兵至懷州城破死焉

強伸河中射糧軍子弟天興初授中京留守明年
元兵傳城伸率卒三百鼓譟而出元兵退旣而行
省胡士率衆走南山鷹揚都尉獻西門以降伸知
城潰乃率死士數百人突東門出轉戰至偃師力
盡就執不屈而死

元史天澤真定人憲宗初為河南等路經略使興利
除害政無不舉誅郡邑長貳之尤貪橫者境內大
治

楊惟中洪州人憲宗時為河南等路經略使俾屯
田唐鄧申裕嵩汝蔡息亳潁諸州初涖官時萬戶
劉福為河南道總管貪鄙殘酷歷二十餘年惟中
至召福聽約束福稱疾不至惟中設大梃於坐復
召之使謂福曰汝不奉命吾以軍法從事福不得
已乃至惟中即握大梃擊仆之數日福死河南大
治

趙璧懷仁人憲宗初為河南經略使先是劉萬戶

貪淫暴戾郡中婚嫁必先賂之得請而後行咸呼
之為翁其黨董主簿尤恃勢為虐強取民女有色
者三十餘人璧至按其罪立斬之盡還民女時人
稱快

張庭珍臨潢全州人世祖時拜南京路總管時有
控鶴軍士十餘人縱橫街市庭珍始至察其必為
盜急捕之得寶玩器服子女滿室窮索其黨俱殺
之民以為神河決灌太康漂溺千里庭珍括商人

漁子船及縛木為筏載糗糧四出救之全活者甚衆水入善利門庭珍親督夫運薪土捍之不能止乃頽城為堰水既退即發民增外防百三十里人免其患

王忱趙州寧晉人世祖時為河北河南道提刑按察副使忱以江南人鬻子北方名為養子實為奴也乞禁之又省部以正軍餘田出調法忱言士卒衝冒寒暑遠涉江海宜加優恤上皆從之改河北

道肅政廉訪副使

崔斌馬邑人世祖時僉河南行省事初詔河南四路籍兵二萬以益襄樊斌馳奏曰河南戶少而調度繁多實不堪命減其半為宜帝從之

鄂森布哈蒙古齊哩克氏大德中累遷平章河南行省時河決落黎堤勢甚危督有司先士卒以築捍之汴以無患

王約真定人至大四年拜河南行省右丞陞辭帝

賜卮酒及弓矢先是有冒獻民地上知之竄建言者而田未給民約至立期檄郡縣釐正如詔會詔更銅錢銀鈔法且令天下稅盡收至大鈔約度河南歲用鈔七萬錠必致上供不給乃下諸州凡至大至元鈔相半衆以方詔命為言約曰吾豈不知第歲終諸事不集責亦匪輕丞相布拉吉達曰善未幾召拜集賢大學士

尚文深澤人武宗時擢河南河北肅政廉訪使會

河決蒲口臺檄令文按視文上疏極言不塞為便
後帝惑於羣言卒塞蒲口不就民苦役者累年竟
如文言

郝天挺安肅人仁宗初為河南行省平章政事時
河南王布拉吉達為丞相待以師禮政化大行卒
封冀國公諡文定

徹爾特穆爾諤爾昆氏天歷初為河南行省平章
政事歲大飢亟議賑之其屬欲以聞曰民饑死者

已衆乃欲拘以常格耶遂大發倉廩賑之而請專擅之罪於朝文宗悅賜以文綺尋改行樞密院事王思誠崞陽人至正初僉河南山西道肅政廉訪司事時議欲疏鑿黃河三門立水陸站以達於關陝移牘思誠相視思誠躬詣其地河中灘磧百有餘里礁石錯出路窮舍騎徒行攀藤葛以進凡三十里度其不可乃作詩歷叙其險執政采之遂寢其議

廉惠山哈雅字公亮輝爾人至正間為河南行省
右丞時有詔發民治決河徧騷屬郡乃亟以不便
上言而時宰不用

董守簡藁城人至正間為汴梁路總管事至即判
庭無留訟有齊人官於梁卒不能返其弟利家貨
匿其兄骸誣訴寡嫂於官下獄隣有豪家覬賤售
其田宅乃同謀賂獄卒殺其嫂以病死聞守簡廉
得其情捕弟及豪家獄卒皆論死宛邱有惡少為

宗族間里害其同黨乘衆怒殺之而誘其妻以逃
事覺有司坐惡少族人以殺人之罪守簡閱牘曰
惡少旣死其妻安在吏不能對乃捕其黨及所誘
妻一訊俱服遂置法人皆稱神明

明馮勝江南定遠人洪武初以都督府右都督兼太
子右詹事率兵取汴克陝洛遂拔潼關還謁上於
行在授右副將軍留守大梁尋克武陟及懷慶獲
將士八百餘人明年調征庫庫特穆爾及西土番

累以功封宋國公十年復命鎮河南十二年董建
周王宮殿十四年徐達率師討故元平章竊爾巴
哈等命勝佩征北將軍印節制河南撫恤軍民衆
心欣附十八年上以勝久鎮于外乃召還京遣禮
曹齋羊酒慰勞又一年卒吏民建祠祀之

康茂才字壽卿湖廣蘄州人洪武初以榮祿大夫
同知都督事守陝州給糧餉造浮梁以濟大軍綏
輯流亡寬條禁明賞罰百姓大悅後移鎮山西民

為刻石頌德卒贈蘄國公諡武義

湯和字鼎臣江南鳳陽人洪武初以中書平章扈從車駕幸汴梁與宋國公勝取河南懷慶封中山侯既而鎮守彰德陶甓甃城多惠政後進封信國公卒封東甌王諡襄武

郭英江南臨淮人洪武初以驍騎左衛指揮僉事從大將軍北定中原平許潁破彰德既還陞驃騎將軍河南都指揮使將赴鎮上遣使以白金廐馬

餞于第時河南新罹兵燹邑井蕭然盜賊充斥英
至布宣威德遠近歸赴者日以千計未期年戶口
倍增政治大洽丙辰移鎮北平河南士女不忍其
去擁英馬數十里不得行有至泣下者旣去為立
生祠後封武定侯卒贈營國公諡威襄

顧時字時舉江南濠州人洪武初以驃騎上將軍
大都督府副使兼知太子率府事統兵取陝洛等
處以功封濟寧侯未幾命守河南撫循士卒境內

賴之卒贈滕國公諡襄靖

安然江南潁州人洪武初為河南行省參政時蔡河壅塞自開封抵陳州漕運不通然親督工役疏導之不逾月功成官民兩便尋陞浙江左布政使仕至四輔官

徐賁江南吳縣人洪武初由薦舉為河南左布政使多善政吏民誦之賁雅有詩名與高啓楊基張羽為吳中四傑

徐士涓浙江餘姚人洪武初為河南副使風紀振肅豪右畏服巡視南陽值大旱士涓乃齋沐虔禱甘雨隨至是歲大有百姓德之明年進按察使王璉山東長山人洪武中以監察御史巡按河南得憲體回奏稱旨上謂近臣曰王璉異日將相才也

董倫字安常真隸宛平人洪武中為河南參議盡心民事名其退食之堂曰後樂方孝孺為之記嘗

草封事數千言悉俞允百姓德之累官禮部侍郎
陳貞字景祺江南華亭人洪武中為河南右參政
時黃河決貞勞來有方民不失業盜發汝寧將窺
汴貞以計離其黨困其首張子誠等于均山遂率
千人降兵不血刃而亂平事聞上嘉其功特降璽
書褒勞之

張士彬江南山陽人洪武中為河南按察使風紀
振揚政化大行

史畢山東章邱人洪武中為河南副使廉明剛介
為時所稱

王平四川新繁人洪武中為河南僉事廉介明敏
嘗行部至孟津宜陽有屬吏以賂通者平械其人
以聞上嘉之勞以璽書綺鈔陞左僉都御史

裴璉湖廣監利人洪武中為河南副使執法不撓
操守清慎吏民憚之官至刑部侍郎

劉真江南廬州人洪武中為河南都指揮僉事訓

練兵馬稽覈屯種居三年誥授世襲指揮使初從大將軍定中原克汴梁陝洛等處其功尤多

郭敦字仲厚山東棠邑人洪武中為河南右參政廉明勤約才識超邁時京師營建敦率民赴役民聞敦督行皆樂趨無後期者

于貞四川營山縣人由貢入監洪武十七年幸學揀拔二十四人貞居其一遂授河南府知府後隨永樂從征有功特陞河南巡撫惠威茂著朝野有

聲

韓克忠字守信山東城武人洪武末為河南僉事
學行純實為一時碩望

薛正言浙江山陰人永樂初以應天府尹出鎮河
南綏人逋亡民賴以安隨召還

賈正儀山西曲沃人優于文學永樂時舉秀才授
河南道御史有直聲歷河南參政謝政夫妻徒步
歸家居紡績朝廷聞而旌之

孟驥江南蕭縣人永樂初為河南左參政躬率夫役疏濬黃河故道自中年抵山東功成民不言病遷四川左布政使

程新山東新城人永樂初為河南右參議臨事不急不徐訟者集庭一言而決人服其明政暇輒觀書不輟或問之新曰古人為政之方盡在是胡可一日舍耶

邵玘字以先浙江蘭谿人進士永樂中以監察御

史巡按河南遇事善斷吏胥無所容其奸所至削
妄費除貪庸克舉其職官至副都御史

周文袞浙江永嘉人進士永樂中為河南左布政
使勵志勤政察官民利病即陳奏而興革之屬吏
有過執法不少貸聲望赫然

吳賜江南貴池人永樂中為河南僉事有盜殺武
陟知縣周正捕獲之以賂懷慶衛官得免賜託為
衛士密行境內知賊為姚祥保等三十餘人及衛

官之納賂縱賊者即令有司捕之一訊伏罪民皆畏服

陳祚字永錫江南吳縣人貢士永樂中為河南參議時屯戍厲民請罪其魁民獲安寧祚為政持大體及去百姓挽留不忍釋

傅啟讓字仲禮湖廣石首人進士永樂中為河南僉事時賊殺長葛教諭吳晉及家屬刼其財事久不白訓導俞珂等繫獄死者七人啟讓微行得生

員胡昭者拘鞠之初未服密令人給其家獲故血衣以示昭遂服並同謀者五人悉置于法人稱其明又嘗奏築堤以禦河水地方賴之官至大理少卿

崔聚江南懷遠人永樂中為河南都指揮僉事勇敢有謀善撫恤軍士未幾陞左軍都督僉事奉命討交趾力戰而死

蕭省身江西泰和人進士永樂中為河南右布政

使有惠政為人溫雅涵容而端潔之操始終一致
士大夫受重之

劉咸字士皆江西泰和人進士永樂中為河南僉
事道律已清嚴用法平恕行部得忠孝節義可以振
勵風俗者必表揚之曰此治化之先務也文章政
事為時首稱有河南詠古集行於世

李昌祺名貞以字行江西廬陵人進士宣德初為
河南左布政使先是境內連歲旱蝗民多死徙宣

廟怒有司不以聞置于法思得人以撫之遂命昌
祺昌祺至則宣布德意疏滯振敝救患弭災繩豪
黠殘質明視事日入方息居數月政化大行聲績
茂著丁內艱去河南又饑宣廟命起昌祺奪情赴
職既至為治如初而勤勞倍之尋以引年乞歸

于謙字廷益浙江錢塘人進士宣德中以兵部侍
郎巡撫河南悉心經畫徧歷其地勸民糴粟俾官
收糴以備荒饑歲恐浥敗即減價而糴旁省皆獲

其濟建議者欲移山東及大名牧馬于河南謙奏
止之每入京議事不持土物賂當路汴人嘗誦其
詩曰手帕蘑菇與線香本資民用反為殃清風兩
袖朝天去免得閭閻話短長其律己之介如此又
因河決侵啗汴堤甚急謙躬至其地解衣塞決口
籲天願以身代已而水果退民為立庇民祠祀之
正統間求解任舉叅政孫原貞王來自代時太監
王振用事嘗以他事銜謙乃嗾言者劾謙擅舉自

代非詔旨降大理少卿罷巡撫河南吏民赴闕請
留者千人迺命以少卿巡撫前後在任凡十八年
後召為兵部右侍郎進尚書加少保英宗北狩謙
有再造功及復辟為石亨徐有貞誣死籍其家無
餘貲蕭然僅書籍耳後贈太傅諡肅愍

魏源字文淵江南建昌人進士宣德中以刑部右
侍郎出為河南左布政使時河南亢旱洊饑百姓
轉徙源至即發倉賑給奏蠲逋賦省汰徭役及諸

不急之務民稍歸雨亦時降是年遂大熟召還復其京秩

劉昱山東武城人宣德中為河南左叅政勇于有為吏民懷畏後改交趾會有逆叛昱奉命征勦被圍死之

韓偉字仲英浙江瑞安人監生宣德中以監察御史巡按河南以清慎著聲轉河東鹽運使

王佐山東海豐人貢士宣德中以戶部侍郎巡撫

河南佐儀表凝重器宇宏深雖政務紛沓未嘗廢
學士林愛慕之尋陞本部尚書卒於土木之難贈
光祿大夫少保諡忠簡

黃澤福建閩縣人進士宣德中為河南左叅政時
南陽多流民澤招諭之賑而遣還又率丁夫執役
于京師躬視疾病撫恤勞苦民無失所官至浙江
左布政使

趙倫陝西邠州人貢士宣德末為河南右布政使

持身廉潔蒞事嚴明吏胥畏之卒于官民咸悼惜
孫原貞江西德興人進士宣德末為河南右叅政
體恤民隱糾察吏弊巡撫于謙嘗薦以自代孫需
弘治末以右副都御史巡撫河南亦以治稱

歐陽哲字廣哲江西泰和人進士正統初為河南
僉事提督學校表率風化得士心陞副使嘗上疏
極言漕河利害上嘉之賜以文綺歷官四十年以
清介稱

虞信字尚忱湖廣沔陽人貢士正統初為河南右布政使性亢直人不敢干以私

饒禮字景節江西南城人正統中為河南左布政使政尚寬恕惠澤及人黎庶咸愛戴之

李奎字文明江西弋陽人貢士正統初以大理寺丞巡撫河南慈惠易直懲戢奸宄時兩河流民多嘯聚剽劫聞奎至皆散去民賴以安

王來字源之浙江慈谿人貢士正統末為河南左

布政使時流民數萬屯聚境內將作亂來撫育安輯仍奏編入戶籍己巳河溢築汴堤植柳護之民賴以安是年進左副都御史巡撫河南凡軍民利病官吏臧否屢陳於朝上嘉之有清勤公正茂著才猷之褒累官至工部尚書

陳鑑字貞明江西高安人正統末為河南右叅議廉介敦謹不通請謁嘗以事忤中官王振振中傷之枷於國門後事釋直聲益著

年富字大有江南懷遠人貢士正統末為河南左
布政使時流民十餘萬聚南陽陳州間剽掠為盜
富撫定之悉籍為民陞左布政使額森入邊道阻
餉絕會富督糧八萬石餉邊尋拜副都御史巡撫
大同既去民肖其像于庀民祠中祀之官至戶部
尚書卒諡恭定

王暹浙江山陰人進士景泰初以右副都御史巡
撫河南築堤置堡以捍河溢又洩沁水為漕渠之

助再踰年境內稍寧乃致仕

王亮字希明直隸大城人進士景泰初為河南右布政使先是河決滎陽田廬禾稼渰沒甚衆亮至始塞決口復開渠引水入漕百姓獲免墊溺之患汴人建祠祀之

王槩字同節江西廬陵人進士景泰中為河南按察使獄無留滯時有囹圄空虛之謠天順初被誣下詔獄時襄王入覲上問官吏賢否王首稱槩上

即宥之官至刑部尚書卒諡恭毅所著有駁藁若干卷為法家所宗

馬謹直隸新樂人進士景泰中以左副都御史巡撫河南至即察屬吏之貪墨蠹民者若干人悉奏罷之百姓稱快尋以老乞去

高明字上達江西貴溪人進士景泰末以監察御史巡按河南宣滯理枉罷不職吏六十餘人以忠直敢言見知于上官至僉都御史

劉昌字欽謨江南吳縣人進士天順中為河南副使提督學校昌博聞強記豐于文詞性與人寡合範士之暇嘗裒集河南名賢遺文作中州文表著岳臺集共若干卷行於時官至廣東左叅政

王恕字宗貫陝西三原人進士成化初以左副都御史巡撫河南值旱蝗恕禱于濟瀆應期大雨復命有司設法捕蝗因上疏自劾乞上崇儉去奢以回天意是歲蝗不為災累官吏部尚書剛正廉直

公忠體國為名臣第一卒贈太師諡端毅

陳選字士賢浙江臨海人進士成化初為河南副使提督學校嘗立社學刊小學書令諸生誦習歷郡縣止宿學宮以身為教諸生翕然感化陞按察使持憲公廉不畏強禦時中官汪直管西廠事能立中人禍以事至河南藩司以下諸官皆竦息郊迎選不為禮俟其至盛服自公署中道入直不能堪詰責之選密疏其專擅之罪疏留中直還上問

河南官孰賢直以選對上出其疏示之直惶懼謝
罪後選以母憂去行李蕭然有車一輛而已士民
遮道送之為立生祠官至廣東右布政使卒諡恭
愍

原傑字子英山西陽城人成化初以戶部左侍郎
巡撫河南考覈文武諸官時以精明公正稱又六
年復蒞河南黨治鄖陽荆襄撫慰彫殘流移日附
奏置浙川桐栢南召寶豐伊陽諸縣事竣陞兵部

尚書未至卒今南陽諸縣皆立祠祀焉

何喬新字廷秀江西南城人進士成化中為河南按察使博學能文剛介寡合鈞州人趙姓者飲陳氏酒肆夜歸溺于河趙之子訟陳毆死誣服喬新曰肆櫛比民居毆必有聞去河且遠負尸往投豈不慮有見者驗其尸腦間有沙遂釋陳又值開封歲饑喬新發麥賑之所全活者甚多官至刑部尚書卒諡文肅

藍忠廣西馬平人成化中以都知監太監鎮守河南資性儉朴政尚簡靜汴汴甚久無費財勞民之事隨侍人役亦知自斂去後汴民思之

吳道宏字文博四川宜賓人成化中以監察御史巡按河南嚴明清慎風紀振揚未幾原傑薦撫南陽襄荆流民民皆安輯累遷南京大理寺少卿張瑄字廷璽江南江浦人進士成化中以右副都御史巡撫河南時按察使何喬新副使陳選並有

廉能聲瑄至首薦之人服其明河南軍糧二十七萬石先在元城交兌瑄以元城非河南轄地不便鈐制乃改置倉于彰德水次軍民稱便明年瑄以例入京議事因奏時宜凡十有八事俱允行比還值大饑瑄發廩賑濟仍於城四門設粥以給饑者出官庫衣布以給寒者無居止者查闕廂空屋以處之全活不啻數萬官至南京刑部尚書

吳伯通四川廣安人進士成化中為河南僉事提

督學校伯通博通六經躬為講解一時生徒造就居多擢浙江副使

馮昱字景陽山東濮州人監生成化中為河南副使時藩府承奉有卞姓者頻出督租至縛民妻孥而裸辱之民積怨將作亂昱乃單騎率健卒數人縛卞數其罪仍疏于朝詔置之法民乃安先是塞河之費歲常數萬昱建順導策河患不作民尤德之

秦紘山東單縣人進士成化中以副都御史巡撫河南會閹直以事經汴竊弄威福聲勢烜赫諸官率屈禮以見紘獨與抗禮略不為屈直亦知重紘不為較已而紘密疏奏直多帶旗校騷擾地方後直回京上以紘疏示之直免冠謝罪紘之聲望益隆改撫宣府去之日士民遮道攀留官至戶部尚書卒諡襄毅

張曉字光曙陝西三原人進士弘治初為河南副

使時河決黃陵岡浸汴城曉奉命治之導河幾千里俾復故道工竣上勞以幣錕進按察使決冤獄人稱神明尋以憂去

張鼎字用和山東歷城人弘治初為河南僉事值黃河汎溢鼎督治有功汴民為立生祠

徐恪字公肅江南常熟人進士弘治初為河南左布政使時黃河溢汴城廷臣建議欲遷諸王府暨三司於許恪疏言不可者有五議遂寢未幾陞右

副都御史巡撫河南時有雨溢冰雹之災恪請減
秋稅上從之又上弭災八事皆中時宜藩府據魯
山民業恪奉命會勘還之民復奏緩積逋之征民
不告病後調撫湖廣瀕行百姓擁留號泣聲聞數
十里官終南京工部右侍郎

李崙字世瞻陝西臨潼人進士弘治初為河南左
叅政清約自持非公事不燃官燭去之日民遮道
送之

韓文字貫道山西洪洞人進士弘治中以副都御史巡撫河南器度恢廓簡重有體慎廉隅重名檢苟有利於民者勇於為之無所顧忌累官戶部尚書卒諡忠定

劉俊字君佐直隸深州人進士弘治中為河南副使性慙直不修邊幅決獄明敏有罪者度不可掩皆首服尋歷大梁河北等道獎善懲惡皆越常格以致仕卒于家石瑤嘗傳其事極稱其直諒清貞

云

馬振燕山前衛人弘治中為河南都指揮僉事正德七年賊劉六劉七等攻掠郡邑都御史鄧璋檄振勦之累戰累捷追及應山以援寡失利死之事聞贈都指揮同知初振祖義父俊俱死於陣汴人稱世忠云

李咨字汝弼直隸故城人進士弘治末以監察御史巡按河南時竹根山賊董宦陳州豪民劉幹怙

惡人莫能櫻靈寶諸山礦盜互相讐殺號為三害
咨至悉除之境内又安比代還民泣送之

陶琰山西絳州人進士正德初以右副都御史巡
撫河南持身清介平徭節費百姓德之歷仕至工
部尚書

才寬字汝栗直隸遷安人進士正德初為河南左
布政使器度閎闊遇事裁答無滯後陞工部尚書
總制陝西軍務遇寇中流矢沒

彭澤字濟物陝西蘭州人進士正德初為河南按察使尋拜右僉都御史巡撫遼東七年薊盜劉六劉七等嘯聚數萬人剽劫屠戮震驚數千里已而長驅河洛攻陷郡邑誅殺長吏上命澤率威寧伯仇鉞總兵馮徵時源帥寧夏延綏遼東兵勦之澤駐師汝寧節制諸軍肅號令明賞罰士卒感奮時賊攻洛陽徵戰死澤命源擊之賊敗走追於狼山獲渠魁趙燧及陳漢等三十七人檻送京師餘黨

悉平汴人為立祠吹臺饗祀不絕

楊子器字名父浙江慈谿人進士正德初為河南
右叅政分守河南道時流賊方渡河子器駐嵩居
守賊走湖廣子器曰賊逼土兵必復向汝州而洛
陽藩籬備不可缺乃自嵩馳赴之賊果至子器晝
夜調度城守益堅賊遂引去事寧轉左布政使入
覲卒于衛輝驛舍

劉玉字咸立江西萬安人正德初為河南僉事提

督學校敦崇行誼深得士心累官刑部侍郎初尹
輝縣有惠政民為立祠所著有執齋文集若干卷
鄧璋直隸涿州人進士正德初以左副都御史巡
撫河南涖政嚴明豪猾屏迹會流賊寇掠境內民
望風奔潰璋極力捍禦綏輯亡徙亟請于朝上命
廷臣帥師勦平之累官南京戶部尚書

秦金字國聲江南無錫人進士正德初為河南左
叅政時流賊攻逼延津金字封邱率先捍禦要駐

叅將宗某合謀戮力相與冒鋒鏑擊賊于剗脚之野大破之賊奔他郡封邱安堵民立生祠于學宮之右累官南京兵部尚書卒諡端敏

何孟春字子元湖廣郴州人進士正德中為河南左叅政治河督運庶務具舉入為太僕少卿官至南京工部左侍郎

孫燧字德成浙江餘姚人進士正德中為河南右布政使平賦役清冤獄以薦拜副都御史巡撫江

西會宸濠叛燧不屈遇害贈禮部尚書諡忠烈

王常字欽佩江南江浦人正德末為河南副使提督學校端方溫雅誨人不倦每燕居必衣冠端坐出入有定期雖風雨無爽諸生服其信官至太僕寺少卿

李承勛字立卿湖廣嘉魚人進士正德末為河南左布政使鎮靜不苛謀慮周至累官吏部尚書卒諡康惠

劉文莊字寅中直隸衡水人進士嘉靖三年以右副都御史巡撫河南時兩河之民經流賊殘虐多散徙四方莊至即檄郡縣緩逋賦之征罷不急之役且調卹之於是逋者乃復引歸吏民頌之

呂憲山東陽信人嘉靖四年以內官監太監鎮守河南繕城池修道路練軍士遇旱則齋沐虔禱雨澤輒應居數年詔徙守備南京吏民為立祠祀之周用字行之江南吳江人進士嘉靖八年為河南

右布政使寡言笑慎操守居官不挈妻子一敝袍
累歲不易比代去囊無餘貲官至吏部尚書卒諡

莊肅

邵銳字思抑浙江仁和人進士嘉靖八年為河南
按察使學行端謹持法平恕士林稱之終太僕寺
卿

孫懋字德夫浙江慈谿人進士嘉靖十二年為河
南左布政使居官清約麤衣糲食蕭然如寒士陞

應天府尹去之日笥中惟圖書藥裏而已懋初為給事中有奏議四卷汴人留刻之省署

朱方字子大山西平定人進士嘉靖十八年以監察御史巡按河南清苦自勵糾察嚴密每巡歷則單騎馳赴雖蕞爾小邑無不親臨姦豪斂迹百姓懷之

鄒守愚福建莆田人進士嘉靖三十五年以副都御史巡撫河南卹民體國綱紀大振尤留心文獻

修河南通志以典要稱

潘思字子仁江南上海人進士嘉靖三十五年巡撫河南崇尚儉素政令清肅興學校杜請託省浮費先知禹州多有惠政士民祀于遺愛祠

張永明浙江烏程人進士嘉靖四十年巡撫河南察吏安民塞河清驛豫省大治陞刑部尚書謚莊僖

林騰蛟福建閩縣人進士嘉靖末分巡河洛時伊

庶人典煥不道軍校橫恣有司莫能制蛟假以巡
行設法剪處凡有不便于民者咸革之時賴以寧
梁夢龍直隸真定人進士隆慶六年巡撫河南安
靜不擾地方寧人百姓頌之

徐汝翼江南上海人進士萬歷三年任巡梁副使
蠲煩滌苛禁姦戢暴造士愛民當創立之始首著
芳績

鍾化民浙江仁和人進士萬歷二十四年以僉都

御史巡撫河南小灘監兌不便于民議欲移置五陵因相視地形修造厰厰民咸德之

曾用升廣東人萬歷中巡按河南凡七年執法不少徇一時貪墨望風解綬時趙藩承奉丁姓者放縱不法用升禽之立斃杖下王為斂容以謝

張惟任陝西潼關人舉人萬歷中巡按河南政行嚴肅民間疾苦靡不周卹凡所彈劾人咸服其公吳國倫江西興國人進士萬歷中任河南叅政剔

弊甚力積弛俱興與王世貞李攀龍謝榛宗臣徐
中行梁有譽號七子以詩文雄於世

李化龍直隸長垣人進士萬厯間知嵩縣賦性剛
方存心慈惻政肅民安陞提學副使教化洽于中
州作為文章時有山斗之望後歷任兵部尚書

葛錫蕃江南蘇州人進士分守河南值福王之國
供應浩大百計以辦校尉恣橫力禦之百姓享其
利賴

葉秉敬浙江衢州人萬厯間名魁先任開封府知府存心愷悌行政務敦大體陞提學副使即進諸生講學歷畧忘倦發明孔孟大義善古文辭尤工臨池翰墨為世所寶一時士風丕變

徐即登字匡嶽江西人進士萬厯三十一年任陳州兵備盜靖民安日集羣弟子講姚江之學從者甚衆著有明宗錄等書

沈季文江南吳江人進士萬厯三十三年以副都

御史巡撫河南時當洊饑屢請蠲賦糴穀備賑下令墾荒全活甚衆大挑朱旺口留漕支給工賴以濟又福邸創建力為節省以班戍代役留監稅充費興工鉅萬毫不累民上下咸利計擒大盜司進忠白玉高二紅四紅等亂萌頓息薦林下諸賢沈鯉呂坤楊東明等衆正登進一時稱之

陳騰鳳福建莆田人進士精治尚書初任禹州士多治尚書皆以鳳為師鳳沉醉冲和多所造就後

督學中州一時名士盡為識拔

張夢鯨山東齊東人進士先知彰德府果毅有為
歷陞布政百廢俱興

盧維屏山西忻州人進士萬曆三十六年初任湯
陰精明惇大實心愛民值歲旱虔禱力請蠲稅躬
歷鄉村分賑饑貧全活甚衆民感其德立碑紀之
入覲留官禮部主事歷河南布政

潘曾紘浙江烏程人進士萬曆四十七年先任新

蔡能燭積弊雖奸吏陰謀一見即決蔡邑小而鹽法難理限引五千有奇涖此土者官民坐困紘申請再四準以戶口減去十之三建書院增學田養士課文無虛日以廉能調商城蔡人立祠祀之後督學中州士風大振歷官至江西巡撫

馮盛明直隸涿州人進士任布政初知扶溝開惠民河以殺水勢直達西華不致泛溢至今無渰沒之患

瞿士達江南武進人崇禎初知開封性嚴正端方
守汴五載民間疾苦悉力祛之陞任管河副使

吳光義江南涇縣人進士崇禎三年任巡撫叅劾
藩宗除民害調兵助民夫築塞河決獎廉鋤強禦
寇有方賊不敢犯界明季已祀名宦木主遭水漂
沒

皇清康熙十六年士民呈請復入祠

楊繩武雲南人崇禎年巡按河南利弊一清官吏

懷然知法

李日宣江西吉水人崇禎初巡按河南力清奸宄
下吏斂迹民享其福陞昌平總制

袁楷陝西鳳翔人崇禎初進士任開封知府廉毅
有大略郡號煩劇訟案苦沉積楷坐堂上令數事
羅跪一時并聽剖決無枉人稱為照天燭後陞河
北守道

陳睿謨江南武進人進士崇禎八年分巡大梁清

正執法捐俸修理禹州儒學造房四十餘間課士
其中名曰潁濱書院請蠲河患地一百二十餘頃
民至今德之陞偏沅巡撫

關永傑陝西人進士崇禎間初任開封推官執法
不阿署開封府興利除害無微不至後陞睢陳道
城破罵賊被害

范景文字夢章直隸吳橋人進士崇禎二年以僉
都御史撫河南嚴戢軍士撫綏地方性正直不阿

為一時所宗仰官文淵閣大學士殉難

李仙風陝西高陵人進士崇禎十二年以僉都御史撫河南值流寇披猖州邑殘毀甫下車即招撫百姓經畫區處使得其所湯陰西山土賊蜂起躬督知府邵公乾勦滅之城以不失

陳必謙字益吾江南常熟人進士歷官御史著抗直聲愍帝書天下清官四人於御屏首劉宗周次必謙尋以右副都御史巡撫河南時流寇猖獗必

譙躬率將士與督師盧象昇戮力行間所向剋捷
豫境獲安執政忌其功以工部尚書召還

盧象昇字建斗江南宜興人進士敎歷中外善騎
射嫻將略臨陣身先士卒與賊格鬪刃及鞍弗顧
失馬即步戰崇禎八年以象昇威名素著命總理
河南五省軍務兼湖廣巡撫未幾加督河南七省
軍務破高迎祥李自成部衆三十餘萬于汝州城
西復大破之確山旣復破賊于滁州城下伏屍蔽

野滁水赤流數里復大破之七頂山殲自成精騎
殆盡時東西邀擊前阻漢江可一戰滅賊而湖廣
鄖陽二撫竟不能禦賊得潛渡漢入鄖會京師戒
嚴象昇去豫賊遂逞不可制象昇後為楊嗣昌薊
薊戰死追諡忠烈

汪喬年字歲星浙江遂安人進士崇禎十五年以
兵部右侍郎兼僉都御史總督河南五省與閹寇
戰於襄城斬獲甚衆會賊衆無援全軍覆沒被執

不屈而死

王源昌字紹貽湖廣黃岡人進士崇禎十三年以
叅議兼僉事分巡大梁時宗室怙寵驕恣源昌涖
任乃止歲旱人相食大盜蜂起設法賑濟防禦郡
賴以全

傅宗龍字仲綸雲南昆明人進士以兵部右侍郎
督師河南奮勇殺賊悉衆圍之諸大帥擁兵不救
兵潰被執至項城賊誑稱秦軍誘守者啟城門宗

龍大呼曰此賊也我兵敗被執門不可啟速用砲擊之母以我為慮賊怒攢刀殺之賊亦退事聞贈兵部尚書加太子少保

楊文岳字斗望四川南充人進士保定總督領兵救汴與流寇戰兵敗死于難

李乘雲字騰洲直隸高陽人舉人崇禎十四年以僉事巡按大梁涖禹州時大饑中州郡縣大半從賊乘雲晝夜防禦闔寇擁衆十餘萬薄南城乘雲

率居人堅守寇旋攻西城拔緣而入遂被縛賊叱之跪大罵因磔之越三日民收其尸面色如生後歸葬州民無不泣送者

孫傳庭字伯雅山西代州人進士天啟元年任永城知縣調知商邱雄才卓犖文武並裕地方利弊靡不備悉崇禎十六年督師河南五省會大帥賀人龍擁衆數萬欲叛公誘其來謁斬之遂收其衆勦寇數捷值大雨七日糧餉不繼師潰回潼關尋

血戰死

曹文詔山西大同人勇毅有智略積功至游擊流寇蜂起以總兵勦寇河南襲破賊于偏店村賊圍涉縣又破之于黎陽圍乃解文詔去河南勦賊于山西賊既累敗避文詔鋒多流河北莊烈帝命文詔追討擊之于懷慶紫陵村馘其魁滾地龍又追斬老回回于濟源賊急詐乞降旋渡澠池南遯文詔改大同總兵崇禎七年寇氛益熾河南禍尤劇

兵部議敕文詔馳勦八年由閔鄉取山路至雒南
商州直擣賊巢後以衆寡不敵自刎于軍自流寇
始起秦晉文詔與賊大小數十戰斬級無算忠勇
為明季良將第一贈太子太保左都督賜祭葬

湯九州江南石埭人崇禎時為昌平副總兵六年
夏流賊大擾河北畿南命九州協勦與左良玉等
屢破之賊渡河而南其冬大敗過天星于吳城鎮
追賊闖天王等五華集又敗之七年擊賊嵩縣之

潭頭以功加署都督僉事九年二月賊走登封石
陽關與伊嵩賊合九州期良玉夾擊良玉半道
遁去九州以孤軍千二百人由嵩縣窮追敗寇四
十餘里悞入深崖遇賊數萬據險攻圍九州勢不
敵夜移營為賊所乘遂戰歿數日有居民見九州
以十餘騎來面目盡血止官廳云湯鎮兵敗過此
役夫方進食忽不見廳壁有新題墨痕末云空有
遊魂徧九垓相傳為英爽不泯

鄭崇儉字大章山西平陽人進士河南推官平反
無冤遠近頌之歷陞兵部右侍郎兼右僉都御史
總督三邊

高名衡字仲平山東沂州人進士崇禎十五年巡
按河南以禦賊功即晉巡撫後流賊久困開封城
中食盡至一螻蟲值二金猶固守賊憤決水灌城
遂引去乃奉旨護周藩北渡

王漢字子房山東掖縣人進士十六年以僉都御

史巡撫河南時劉超反永城躬往捕之遇害先知
河內多惠政修城勦寇邑民德之

陳潛夫浙江錢塘人舉人明末授開封推官陞河
南巡按時閹賊殘破之餘民各築砦堡彼此攻殺
潛夫以順逆禍福曉諭民得安堵閹賊據關中郡
縣徧置偽官潛夫協同總兵劉洪啓興平伯高傑將
恢復中原值京師失守痛哭失望歸江南會方興
東林黨詔下獄尋卒

凌嗣江南歙縣人進士崇禎末年為兵部職方司
後巡撫河南駐節歸德聞流寇陷京師與姪潤生
俱自縊死

皇清吳景道遼東人順治二年由布政使陞巡撫駐節
杞縣歷任十載招撫流民開墾荒蕪擒南陽大盜
關索等大同總兵姜瓖反勢張甚景道防河嚴肅
民賴以安曹濮之亂委總兵高第綏輯歸德秋毫
不擾潛擒李化鯨餘黨加尚書歸卒康熙十五年

祀名宦

朱昌祚遼東人三省總督秉性忠貞端己率屬嚴飭將士兵民戢和後以冤死尋得白予祭葬諡愍康熙五十五年祀名宦

張應祥遼東蓋州人明末寧南侯標下副將率兵投誠歷陞汝南總兵加銜右都督世襲二等阿達哈哈番奉

旨入籍南陽數遭寇亂白骨遍野應祥先修城池次築

廬舍次設營房更捐義塚埋枯骸遇荒則傾囊以濟南陽兵威漸張叛賊王光泰等相繼翦平疆宇肅清尤喜勸人讀書雍正七年祀名宦

羅文現奉天廣寧人任南汝道僉事給牛種開荒蕪遇歉歲捐貲施粥所全活者無算禁差徭恤閭閻去後民猶思之康熙四十八年祀名宦

許得功遼東開原衛人順治二年以左都督鎮汝南時軍壘初立諸事草創得功竭力營辦什伍精

嚴遂成巨鎮又御軍有紀民得安堵康熙四十七年祀名宦

金玉和遼東人初為河北總鎮值闖賊大舉環攻懷慶及諸屬玉和鼓勇迎戰身先士卒為流矢所中復陷澤中遂被害後得屍戰所歸葬

申朝紀遼東人順治初以河北道駐懷慶闖賊十餘萬來攻人人恟懼朝紀神色整暇部署井井分守郡城每女牆兵一民一戒勿譁譁者死賊周走

呼曰城陷矣一人偶動朝紀即手斬以徇守者益
肅賊帥繁纓白馬于濠間指揮攻圍狀朝紀令以
飛礮擊之應手斃圍遂解追奔得級無算

亢得時滿洲籍山西崞縣人順治二年任巡撫號
令嚴肅吏民守法捐俸置學田二百六十畝延師
造士文風蔚起康熙九年祀名宦

丁文盛遼東人順治四年任按察使用法平允囚
無冤獄駐劄蘭陽卹民造士政績尤多人懷其德

祀名宦

塗廓遼東人順治四年兵巡河北道副使性明爽政事一本至誠時山東賊劫武安諸縣廓率兵士勦殺躬冒矢石遂遇害

胡士梅錦州人順治五年任祥符令時汴城被河決之害暫駐城東掃頭集士梅招流移問疾苦新安十三寨之民賴以全活者甚衆順治十年以赤城同知陞河南屯道勸墾有方闢地十里增課二十

七萬舉卓異後祀名宦

劉三元遼東人順治五年分守河南時瘡痍未復
加意撫綏尤軫念學校十年陞按察使

于時躍遼東瀋陽人順治六年任分守河南道清
操無兩應變如神吏畏民懷境內大治歷陞巡撫
祀名宦

張存仁遼東人收平浙閩有大勲順治七年草寇
嘯聚山東榆園蔓延河南存仁總督直隸河南山

東三省勦撫有方寇孽遂屏跡百姓安堵立石頌之
樓希昊遼東人順治九年以參政分守南汝時賊
黨吳加寬于七等煽亂希昊率葉縣知縣許鴻翔
勦平之

李憐江南華亭人進士順治十年任河南提學道
考校公明拔取孤寒尤嚴懲劣生詳正祀典以憂
去行李蕭然僚屬助之貲乃得歸祀名宦

張天植浙江秀水人順治己丑進士第三人順治

十一年由按察僉事董學政甄別人才精選拔喪亂以來文風自此漸開

李蔭祖遼東人順治十一年任三省總督首除私派嚴禁防兵弭盜有法嘗單騎曉諭劇盜盜皆化服祀名宦

桑芸山西榆次人進士順治十二年以叅政守南汝鋤暴恤良頌聲載道十六年遷河南右布政

沈荃字繹堂江南華亭人順治壬辰進士第三人

順治十三年由翰林出為按察司副使分巡大梁
道時學宮多燬圮荃捐俸鼎新聖賢祠墓力為興
復頻年河夫柳束及軍需浩繁荃為詳請禹鄭十
餘州縣得減三分之一以憂去士民為建碑立祠
王勰浙江嘉興人順治壬辰進士十三年以翰林
檢討為提學副使凡所取皆績學之士以勞瘁卒
官

王原撫直隸真定人順治十三年以叅政守大梁

尋陟臬使慎持邦憲苞苴屏絕折獄明敏又禁革
姦行商賈輻輳祀名宦

于鵬舉江南金壇人進士順治十五年由翰林任
睢陳兵巡道招流亡給牛種墾萬餘頃祀名宦

李昌祚湖廣漢陽人順治壬辰進士十六年由翰
林任河北道叅議除姦蠹禁私派築堦陽堤以禦
黃河濬廣濟渠以分沁水民賴其利

張瑞徵山東萊陽人進士順治十六年任南汝道

不數月平定光商巨寇士民賴以安輯

徐化成奉天人先任光州招集流亡民獲安堵有
巨寇張可大羅平等負固山寨設計擒之順治十
六年陞河南左布政藩署自雁河患移駐雍邱康
熙二年始歸省會以舊仁和藩府改建捐俸庀材
民無工費之擾

張自涵山東平原人進士順治十七年以右叅議
分守河南道清操自勵不名一錢飭吏安民尤多

政績

張自德遼東籍豐潤人康熙元年巡撫河南明末會城公署罹闖賊決水圯廢

國初移駐杞縣自德請開事例繕完城墉新建各署不煩民力而工用俱足其他善政纍纍傳頌人口祀名宦

蔡含靈字子虛直隸寧晉人進士康熙元年以僉事分巡睢陳道釐正賦役戶口均平署臬篆熱審

三百六十餘案多所平反以勞瘁卒官祀名宦

張九徵字公選江南丹徒人進士康熙三年任提學道識鑒淵澄黜陟允當士皆悅服請托不行檄各郡邑修葺學宮增置社學廣置書籍於庠序聽諸生就讀凡境內陵墓祠宇有關名教者俱加葺治以潘岳忠孝兩虧詳請燬祠搜訪殉難各名臣姓氏亟為表章舉卓異祀名宦

史逸表字雲次浙江仁和人進士康熙七年提學

中州考校公明所拔多單寒士教諸生以孝弟忠信為首務又檄郡縣有忠孝節義立行申報轉請題旌以發潛德祀名宦

佟鳳彩遼東人先任河南糧道康熙十一年任巡撫疏請修築河工盡出官雇不費民力又請罷協濟楚省輓豆之役葺大梁書院購書置田延師課藝士風丕變康熙五十年祀名宦

范周江南吳縣人進士康熙十一年任糧儲道節

減漕項耗銀三萬餘兩報明從優議叙隨以內陞
去康熙四十二年祀名宦

郎永清遼東人康熙十三年任布政使護理撫篆
題豁靈竇荒地宿逋又力請撥協楚米改解折色
民便之祀名宦

王永譽遼東人康熙十三年任提督時遣禁旅收
總兵蔡祿於懷慶永譽由孟津渡河為犄角勢兵
至擒之不煩血刃嚴戢部伍閭里晏然懷人德之

為生祠以祀

石琳滿洲人康熙十三年任按察使貌稽辭聽洞燭若神己未歲禁旅南征駐牧於汴時當麥秋琳與統軍約令其曠野為壘不得入市琳坐其帳中四十餘日及去民得獲麥琳之力也

黃標奉天人康熙十四年以按察副使管河道先守開封府稔知利弊自是整理河務戢寧不擾節用恤民人皆稱便

莊朝生江南武進人進士康熙十五年任提學道
冰潔自矢人無敢干以私者培士氣正文體士人
頌之祀名宦

吳子雲字五崖江南桐城人進士康熙十八年任
提學道正文體絕弊竇拔單寒士論歸之祀名宦
項一經湖廣漢陽人進士康熙十九年以副使分
巡南汝道持躬平和臨事則毅然有守喜獎士類
力培文風其修葺橋梁禁革夫頭諸善政汝民至

令思之

王日藻字印周江南華亭人順治乙未進士康熙二十一年以副都御史巡撫河南先任管河道素知中州民困以兌運累民疏請永折報可之日八郡若更生又恤堡夫樹堤柳人皆呼為王公新柳云

林堯英福建莆田人進士康熙二十一年任提學道杜絕請托務拔單寒置嵩陽學田肄業者賴之

祀名宦

蔣伊字謂公江南常熟人進士康熙二十四年任
提學道嚴絕苞苴有暮夜投金者面唾之愧服而
去居平嚴以律已厚以待人考校所至車馬供給
不擾民間文廟及名賢祠墓多捐俸修葺繙閱試
卷輒至達旦以勞瘁卒官兩河人士皆為盡傷一
時輓詩有百世師恩千點淚兩河宦橐幾篇文之
句祀名宦辛丑歲孫連復視學中州公明亦克繩

武

張潤民山西夏縣人進士康熙三十年任督學杜請託絕苞苴衡文造士一秉至公所取多知名士士人至今思之祀名宦

顧沂字伊在順天大興籍江南長洲人進士康熙三十二年任河南巡撫寬協運以恤民艱軫漕累而歸官辦慎刑獄正士風口碑載道祀名宦

李輝祖正黃旗人康熙三十四年任巡撫下車三

日視學明倫堂訓誨諸生首申忠孝大義飭行通
省嚴禁私派重耗民甚懷之康熙五十四年紀名
宦

李國亮奉天海城人康熙三十五年由河南布政
使陞本省巡撫首教化敦實行建修書院延請名
宿以訓課士子人文蔚起飭武備勸開墾除私派
禁陋規河工夫役柳梢俱出官辦不以擾民祀名
宦

周銓元遼東錦州人康熙三十五年由管河道陞任分守道詳豁協辦江南柳束改河夫派協里下者官自僱覓民獲更甦因小灘寫遠運米不便議改衛河水次官民便之尋署藩篆解米陝西不擾閭里再攝臬篆冤抑多所平反民頌其德祀名宦張仕可字惕存江南丹徒人進士康熙三十六年任提學道勤于校閱所取士多獲雋按臨各郡薪水自辦不累民間祀名宦

胡世藻山東章邱人進士康熙三十七年任提學
道甫下車即查各府州縣學宮有頽壞者飭有司
設法修葺或捐俸助工祀名宦

徐潮字青來浙江錢塘人進士由庶常累陞刑部
侍郎康熙三十九年出撫河南潔己奉公屏絕苞
苴凡加平增耗及郡守季規極力革除大糧折色
火耗止一分著為令餘如南陽黑鉛賠累衛輝辦
漕陋規會城上下供應發馬派買併土棍壟斷市

集諸積弊通行禁止開濬溝洫以資兩河灌溉訓
誨屬員俾知奉法急公內擢戶部尚書兼翰林院
掌院學士教習庶吉士會議築洪澤湖隄潮議稱

旨承

命往董其役經畫區處費省工捷

聖祖臨視嘉悅擢吏部尚書逾年以疾致政歸後旋詣闕
恭祝

聖壽

金匱要略卷五十四
恩賚有加既卒於家

賜葬祭雍正十一年奉

旨建賢良祠於京師

特予入祠復於本籍

賜祭一壇

御製祭文以示褒獎祀名宦

張瑗字蘧若江南祁門人康熙辛未會元四十二
年以御史提督河南學政整飭士習屏絕苞苴歲

試未竣以勞瘁卒官祀名宦

甘國基正藍旗人康熙四十二年任布政使減火耗禁私派懲貪酷延師教士置學田以資膏火一時成就者甚衆祀名宦

趙珣直隸武清人進士康熙四十九年任提學道考校公明事有關於學政者悉行振刷忠孝節義表章尤多祀名宦

李苾順天大興人康熙五十一年任布政使廉明

仁恕時春夏亢旱二麥不登必細加查驗成災州縣
轉申巡撫題報得減錢糧若干其不成災者量加
賑濟一時民慶更生祀名宦

陳至言字山堂浙江蕭山人進士由翰林院編修
康熙五十三年任提督學政下車即懇懇以崇正
學敦本行端士習正文體告誡諸生又飭各州縣
興賢育才士氣丕變祀名宦

田文鏡字抑光奉天正黃旗人秉性清介剛正不

阿由國學生筮仕福建長樂縣丞尋宰晉之寧鄉
遷直隸易州牧屢膺循卓政聲赫然識者已卜為
大器繼歷部曹拜侍御史巡視長蘆鹽課釐政肅
清洊陞內閣侍讀學士今

上御極元年因奉

命祭告途經山右流移載道還朝繪圖入告為民請命
深契

宸衷遂命馳驛往賑全活無算旋署山西布政使次年

調河南布政使剔除藩庫積弊頒催科條約屏除
餽遺嚴絕侵那吏剔民懷倉府充牣奉有

御書良哉岳牧之褒是年冬晉撫河南豫省宅居土中
民風樸厚向以有司不能謝却苞苴吏緣為奸豪
猾耽視境鮮以寧養安之習蓋自為藩司時即深
疾之至是大加創懲鋤豪強剪勢惡官吏之奸汚
貪墨者悉置諸法青衿之挑達不馴者褫其章服
下令如流水肅紀如秋霜俗為丕變初聞其政者

或驚且駭咸以為不近情久之而善良蒙福宵壬
革心乃知其才識宏達操持果毅屹然如泰山喬
嶽之不可干犯而潛移默化所以惠我嘉師者實
深且厚也歷三年加兵部尚書河南總督踰年授
總河東河東設總督始此岱嵩相望環數千里節
制文武益加整肅東人翕然從風如大河南北其
政事之最著者如澄吏治足軍儲廣積貯籌輓運
治河渠勸開墾嚴斥墾肅邦傳又奏免沙礫錢糧

節省公費盈餘皆實裨於民不可枚數未幾蒙

恩晉秩宮保數年之中

諭旨褒嘉璽書慰勞珍昵之錫

賚予之隆皆直省督撫所罕匹而其公忠體

國不結黨援不避嫌怨惟知以身報

主之誠夙夜不懈即力疾視事念不忘

君懷古大臣蹇蹇匪躬之義始終一轍以是獲

眷最深生榮歿卹異數疊增知遇之崇亦古今莫並焉

初以衰疾陳情奉

旨徐緩入京賜藥調攝時時

召對數月旋任又踰年卒於官

上聞震悼倍至遣官致祭賜諡端肅

特命於河南省城立專祠祀之而士民猶公籲請入賢

良祠合饗以伸愛慕弗替云

河南通志卷五十四